


#فلاشات

#أحمد و صفيه

الجزء الثالث



أحمد إيراهيم موسى

ثلاثة أجزاء في ملف واحد

#فلاشات

أحمد و صفية

أحمد إبراهيم موسى

صفية

إهداءً إليك ..

كتبْتُ " إهداءً إليك " ولم أكتب " إهداءً إليها " ..
فحاشاكى أن أهديك شيئاً بصيغة الغائب ..
أنتِ لم تغيبى واقعاً أبداً فكيف تغيبين لفظاً ؟ ..
وكلُّ مكتوبٍ هنا كتبَ لكِ وبكِ ومعكِ ..

أحمد إبراهيم موسى

صفحة

رسالة

خَلَّفْتُ ورائي من العُمُرِ ما قضيت .. ضحكْتُ قليلاً وبكيتُ كثيراً ..
سَمِعْتُ وتكلمْتُ .. رأيتُ وشاهدْتُ .. قرأتُ وتعلمْتُ ..
أصبتُ مرةً وأخطأتُ مراراً ..
وفوق كل هذا انتظرتُك كثيراً كثيراً ..
وبعد كل ما فات وقبل ما هو آت .. أقولها ببساطة ..
سيدتي أنتِ تستحقين الانتظار ..

وصيفة

مقدمة

عن كل اتنين .. ييجبوا بعض .. بيدوبوا جوا بعض ..
 عن عندها وعصبيتها .. عن رقامتها وبروده ..
 بس قبل دا .. عن طيبتها وحنيتها .. عن ثقتها فيه وخوفه عليها ..
 عنهم لما يتخافوا يفتلوا فوش بعض وهما بيتقطعوا من جوه ..
 عنها لما تبكى على المخذة وهو يقعد يلوم نفسه ..
 عنه لما يبعثها مسيدج قبل ما تنام ويقولها " آسف .. متزعليش منى ..
 متناميش زعلانه " ..
 وعنها لما تصحى من النوم وتكلمه تقوله " صباح الخير يا قلبى " وكأنه
 مزعلهاش امبارح ..
 عنهم وعنهن ..
 وكان عن أحمد وصفية ..

وقفة قبل القراءة ..

* إيه هي الفلاشات ؟ .. الفلاش يعنى ومضه لحظيه .. كل فلاشة منهم اتكتبت عادى جداً لوحدھا .. لكن الناس طلبت أنها تتجمع فى ملف واحد علشان تقدر تقرأھا كلها .. الفلاشات عبارہ عن " كوميكس " مكتوب مش مُصور .. ممكن مره تطلع حلوه أو مره تطلع وحشه .. مره تطلع لذيذه ومره تطلع سخيفه .. بس أنا حاولت أنها تكون بترسم بسمة ويارب أتوفق فى كدا ..

* لو داخل تقرى أدب و هتمسك قلمك وتقيم المكتوب أدبياً أقفل الملف وامسحه من عندك لأن الملف دا لا ينتمى لأى أنواع الأدب .. الملف هو مجرد وسيلة لرسم ابتسامه بسيطة وتغيير المoods .. أنا شخصياً لا أجرؤ أنى أقول عليه عمل بالمعنى المطلق أو حتى المجازى ..

* الملف عامل زى كيك تودو كدا .. لا بتحل ولا بتربط بس ممكن فالمواصلات او فالخنقه او بين مذاكرة مادتين رخمين تطبط .. لانها بتخلص فى نص ساعه ..

* رجاء حاد وجاد عدم تقييم الملف على الجودريز بأكثر من 3 نجوم ..

* الفلاشات بالكامل بما فيها من فواصل و أبيات شعر من تأليفى .. ما عدا الجزء المُشار إليه فى صفحة 18 باللون الأحمر قُمت بنقله نصاً من أحد الأصدقاء .. أى تشابه بين أى جزء من الفلاشات و أى منشور على الفيس بوك فهو منقول من الفلاشات وليس العكس على الاطلاق ..

قمة الجنون "الأ تُحب شخصاً أحبك"



و صفيته

- 1 -

جالسةً على العُشب الأخضر .. ضمت زُكبتها ثم طوقتهم بذراعيها وشردت قليلاً تُتابعُ بعينها الحاملتين سرباً من الحمام يُحلقُ في السماء .. تأملتها قليلاً ثم انحنيتُ إلى ماء النهر الرقراق الجاري أمامنا ثم ملأتُ كفيَّ بالماء في هدوء ..
وجأةً ..

استدرت ناحيتها ثم قذفتُ بالماء في وجهها وأنا أضحك .. عقدت حاجبها في غضبٍ طفولي لذيذ يُزيدني عشقاً لها وأخذت تمسحُ قطرات الماء بغطاء شعرها قائلةً :

- أنا قلتك مليون مره إنت مجنون .. مجنون .. مستحيل تكون طبيعي أبداً ..

- بتقولى عليا مجنون يا صفيه ؟ .. يا بنتى دانا أعقل حد فى الدنيا دى
علشان حبيتك انتى .. يا صفيه دا الجنون إنى محبكيش ..

أهبل اللى يخلى واحده تعيط
وهبله اللى تعيط علشان واحد

يا شوية هبل



فلاشيتي
احمد و
صفية

- 2 -

انتحبت حتى كادت حنجرتها أن تخرج مع زفيرها .. تركتها حتى انتهت ثم
قلْتُ بهدوء :

- مش كفاية عياط بقى ؟ ..

ردت بصوتٍ مُختنقٍ ولعابها يمنعها من التنفس :

- وإحنا مش كفاية بقى ؟ .. هو كل يوم خناق ؟ .. كل يوم ؟ .. أنا بقيت
حاسة إننا مع بعض علشان نتخانق مش علشان بنحب بعض ..

سكْتُ قليلاً .. أصيغُ كلماتي ألف مرة حتى لا أدفعها إلى البكاء ثانية :

- وهنعمل إيه ؟ .. هو دا إحنا .. دى إنتى و دا أنا .. واحدة عندي و واحد
عصبى .. تقريباً هفضل كدا كتير .. بس أنا عايز أكمل معاكى ..
عايزك تعاندى فاتعصب عليكى .. تعيطى فأصالحك .. وأرجع أشوف
ضحكتك من ورا دموعك وأقولك بعشقتك ..

اندفعت كل الدماء من أنحاء جسدها إلى وجنتيها .. غرقت في بحرٍ من
الخلج .. عضت شفاهها السفلية بصف أسنانها العلوى ونظرت إلى موضع
قدميها .. تبحثُ عن أى كلماتٍ في رأسها .. لم ينطق لسانها بأى حرف ..
يبدو أنها نسيت كل شيءٍ تماماً كما نسيْتُ أنا .. رفعت عينيها إلى عينيَّ
وقالت الأعينُ مالم تستطعه الألسن ..

"

متكذبوش ..

وجع الحقيقة أرحم بكثير من وجع اكتشاف الكذب

"



صفيته

فلا تترك أحداً و

- 3 -

نظرت إلى طويلاً طويلاً .. استفزتني نظرتها تلك فقطبتُ حاجبيّ وقلتُ في استنكار:

- مالك يابت ؟ .. أنتي هتفضلي بصالي كدا كتير ؟ .. صورتى عالفيس ممكن تبقى تاخديها على فكرة وتبصيلها زى مانتى عايزه ..

ظلت على صمتها المبالغ فيه .. انفرجت شفتها وكأنا على وشك أن تسأل سؤالاً ما ثم ابتلعت ريقها وابتلعت سؤالها معه وظلت صامتة .. هنا كنتُ على وشك الانفجار في وجهها فقلت :

- متنطقي يابت .. فيه ايه ؟ .. كأنك عايزه تسألنى سؤال وخايفه تسألينه .. متنطقي ..

- إنت عُمر كدبت عليا ؟ ..

باغتني السؤال كمن لدغه عقرب ، كان السؤال صادماً وغير متوقع بالمرّة .. صفة لا تسأل سؤالاً تشكُّ في إجابته .. عندما تسأل سؤالاً تعلم علم اليقين أني سأجيبها بمنتهى الصدق .. هكذا تعاهدنا حتى لو كانت إجاباتنا موجعة أو مؤلمة لكننا .. أخذتُ نفساً عميقاً وأنا أترجعُ إلى الوراء وقلتُ بهدوء شديد والابتسامة على وجهي :

- كتير ..

نظرت إلىّ في استغرابٍ مدهول وقالت في إنشدها مُكررةً لفظتي " كثير؟ "
.. أومأت برأسي إيجاباً ثم اقتربت منها حتى تلامست أنفاسنا وقلت :

- آه كثير .. لما بنتخانق سوا ونزعل شوية وأقولك بكرهك ساعتها ببقى
بكذب لأن قلبي ساعتها بيرد يقول متصدقيهوش .. كذاب .. دا بيحبك ..

فانشات أحمد و صفيه

متقساتش عليها .. احتويها ..
كفاية إنها حبت واحد زيك أصلاً ..



صفية

- 4 -

ابتسمت فأضاء وجهها كالبدْرِ يومِ تمامه .. ابتسامتها عذبةٌ سهلة بلا
تكلفٍ ولا تصنع .. نظرت إليَّ ثم أطرقت وجهها وهي تقول :

- أحمد ..
- نعم ؟ ..
- قولى كلام كبير ..
- مممم .. كلام كبير ؟ .. قد قلبك كدا يعنى ؟ .. طيب .. عارفه يا
صفية ؟ .. أنا قلبى ممكن يكون قاسى أوى .. أنشف من الصخر بس
معاكى بيكون عامل زى حباية العنب لما تمسكيها بين صوابعك .. شفتى
هى طرية وضعيفه إزاي ؟ ..

سكتُ قليلاً لأراقب وجنتيها اللتين توردتا كبتلات الورد .. تركتها قليلاً
ثم قلت :

- صفية .. ممكن طلب ؟ ..
- طبعاً ..
- متفصيهوش يا صفية ..

اعذريه لما يغير عليكى ..
الغيرة مش خنقه .. الغيرة نخوة ..

الحلاوة عمرها ما كانت بالشكل
ممکن العجلة تكون أحلى من الموتوسيكل

صيفيه

- 5 -

انتظرتها كثيراً .. حاولت الاتصال بها لكن هاتفها لا يزال غير متاح حتى اللحظة .. تشاغلْتُ بهاتفى فى غضب .. بعد قليل اقتربت فتاة ووضعت حقيبتها على المنضدة التى أجلس إليها .. مهلاً .. هل قلت فتاة .. اعتذر عن الكلمة .. الكلمة الأبلغ هنا أنها كانت صاروخاً من حاملى الرؤوس النووية .. جلست أمامى فى بساطة وكأنها اعتادت هذا .. لو أنتى لم أتفق مع صفية على اللقاء هنا فى هذا الوقت لقضيتُ معها بقية اليوم .. لكن ماذا أفعل وصفية على وشك القدوم .. هممتُ بإخبار الصاروخ أن أحدهم سيأتى للجلوس معى .. نظرتُ إلى وجهها .. كان يبدو مألوفاً لى إلى حدٍ بعيد .. سأشوق نفسى لو كنت تعرفت عليها سابقاً ثم تركتها تفلت من بين يديّ .. لم تترك لى مجالاً للحديث وقالت :

- إيه يا أحمد إنت مش عارفنى ؟ ..

وكان ألف صاعقةٍ ضربت أذنى وزلزال قوته 10 ريختر قد ضرب رأسى .. اتسعت عيناي حتى التهمت الفضاء المحيط ولا أدرى كيف خرج صوتى هادراً هكذا :

- صف .. صف .. صفيفيفيفيفيه ؟ .. إنتى إيه اللى عاملاه ده ؟ ..

- عامله إيه بس يا أحمد .. منا حلوة أهو ..

كانت أعصابي تحترق كالحديد المصهور خاصةً مع ابتسامتها اللزجة تلك ..
قلت في غضب :

- حلوة إيه ؟ .. حلوة إيبيبيبيبيه ؟ .. انتى ايه اللى عاملاه فى حواجبك دا ؟ .. دى فدداين مش حواجب .. هى عاملة زى الأجنحة كدا ليه ؟ .. متخيلة لو حركتهم أربع مرات لفوق هتطيرى مثلاً ؟ .. وبعدين إيه الراج الغبى دا ؟ .. اللون دا بيدهنوا بيه شفایف الجُثث فى الأفلام .. وبعدين انتى لما هتروحي تحطى بودة تلك على خدودك لأن اللى انتى حاطاه عليها دا مش أحمر خدود دا تسلخات .. لو كنتى عملتیه فى بيوتى سنتر كنت قلتك دا نقاش وربنا فتح عليه ..

لم تترك لى المجال للاسترسال فى غضبى .. حملت حقيبتها فى صمت ثم قامت من جلستها وتركتنى فى فورة غضبى .. كدت أسحق المنضدة بقبضتى عندما سارت بعيداً .. شيئاً فشيئاً بدأتُ أهدئ من نفسى .. أحضر النادل كوپين من العصير أحدهما ليمون والآخر مانجو .. نظرتُ إليه فى استغراب فأخبرنى أن الأنسة طلبتها لنا قبل أن تتوجه إلى دورة المياه ..

بعد قليل رأيتها قادمةً من بعيد .. لم أنظر إليها .. سأقسو عليها إلى أقصى قدرٍ ممكن .. كيف تجرؤ على فعلتها هذه وهى تعلم علم اليقين أنى أكره مساحيق التجميل التى تُحيلُ وجوه الفتيات إلى وجوه الزومبي ؟ .. جلست

وسادت بيننا فترة من الصمت لم تلتقى فيها عيوننا .. تنحنحت وملت
شوات نفسها ثم قالت بهدوء :

- أحمد .. شيلت الميك أب أهو .. لسه زعلان ؟ .. متزعلش بقى علشان
خاطري .. أنا آسفه ..

لم أجبها تحاشيتُ النظر إلى وجهها كي لا تسقط عيناى على حاجبيها فانتفها
نتفاً .. فأملت قائلة :

- يا أحمد خلاص بقى .. مش هعملها تانى .. أنا بس كنت عايزه أبقى
جميلة قدامك مش أكثر ..

وكانها نزع الفتل فانفجرتُ في وجهها :

- ومين قالك إنك كده هتبقى جميله فى عيني ؟ .. أنا أول مره شفتك فيها
وكل مره شفتك فيها مكنيتش كده .. إيه اللي يخليكى تفتكرى إنك لما
تبقى عاملة وشك إشارة مرور هتبقى أحلى فى عينيا ؟ ..

لم تُجب بالطبيعة فنظرْتُ في عينيها وقلت خافضاً صوتي لدرجة الهمس :

- يا صفية .. يا صفية أنا حبيتك كدا من غير ألوان .. طول عمرك بيضا
ونقيه من جوه .. ألوانك اللي بره متلزمينش .. مش عايز ألوان بره تبقع
على قلبك الصافى .. خليكى ليا بس .. وكمان ألوانك بتلقت انتباههم ..
بتستفز تفكيرهم فبيصولك .. لما بيصولك كأنهم بياكلوا حته منى أنا ..
صفية ممكن متخليهمش ياكلونى ؟ ..

متقشوش ..

القسوة ممكن تولد بُعد والبُعد هيجيب جفا ..

القسوة برد وقلوبكم محتاجه الدفا ..

صفية

- 6 -

" متتكلم يا أخی .. متسكتش .. حتى لو هتشتمنى بس اتكلم .. أنا عارفة
إنى غلظت " قالتها فى عصبية وتوتر كبيرين .. نظرتُ إليها بوجه جامد ..
أعرفُ أن صمتي يقتلها .. لكن خطأها لا يُغتفر .. ولطالما حذرتها من فعلتها
هذه فى السابق .. زفرتُ زفرةً حارة كادت أن تحرق وجهها ثم أدتُ وجهي
ناحية النهر كالمعتاد ثم قلت بهدوء :

- عارفه يا صفية .. أنا كنت بسأل نفسي هو إحنا إمتى هنزعل من
بعض ؟ .. مش علشان بحب الزعل منك .. لا .. بس علشان اللي
متوجعش يبقى محبش .. دلوقتي أنا عرفت إنى بحبك وعلشان كذا أنا
سامحتك ..

تهلل وجهها فرحاً وارتسمت على وجهها ملامح الطفولة وقالت فى ابتسامة
واسعه :

- ياااه بجد ؟ .. مكنتش أعرف إنك هتسامحنى بالسهولة دي .. قد كدا
بتحبني ؟ ..

- أنا سامحتك آه بس انتى نسيتى إن أى غلط وليه عقوبة .. وانتى لازم
تتعاقبى ..

- وأنا موافقة .. قول العقوبة وأنا أنفذ من غير ولا حرف ..

لم أنطق بحرفٍ بعدها .. قُمتُ من جِلستي ثم انصرفت تاركاً إياها في حيرة شديدة .. ناديت على النادل وأخبرته هامساً أن حساب العصير ستقوم الأنسة بدفعه .. أخطأت هي عندما أخبرتنى أنها نسيت تقودها بالمنزل قبل أن تأتي إلى النادي .. ارتكنتُ إلى أحد الجدران ورُحْتُ أراقبُ توترها من بعيدٍ في جذل ...

أحمد و صفيبه

معلش .. تعالوا على نفسكم واستحملوا بعض ..



فلاشيت
أحمد و
صفية

توترت أعصابها أكثر فأكثر حتى صارت تأكلُ أظافرها أكلًا .. تنظرُ إليَّ وأنا صامتٌ أراقب مياه النهر كعادتي لم تستطع التحمُّل بعد فقالت في عصبية :
- فيه إيه يا أحمد خضيتنى .. قتلنى عايزك فى موضوع مهم ومن ساعة ما قعدنا وانت ساكت ..

نظرتُ إلى البراءة التى تُغلفُ كل خليةٍ من وجهها ، استجمعت شجاعتي
وقلت :

- صفية أنا مش راضى عن علاقتنا دى .. أنا مبعقش حابب حد يشوفنا مع بعض .. لازم لما نتقابل منكوش خايفين ..
نظرتُ إليَّ فى بلاهة ثم تغيرت ملامحها شيئاً فشيئاً .. يبدو أنها فهمت ما أرمى إليه لكنها غضبت فجأة وكادت أن تصرخ وهى تقول :
- إنت إزاي عايزنا نتقابل فى شقتك يا أحمد .. إيه الكلام دا ؟ .. إنت اتجننت رسمى ..

كدتُ أن أقذف بكوب المياه فى وجهها وأنا أصرخ :

- شقتى إيه يا متخلفه انتى ؟ .. أنا جبت سيرة شقه وللا نيله ؟ ..
هدأت قليلاً .. نظرتُ إليَّ ثم نظرتُ إلى حقيبتها وبدأ على وجهها أمارات التفكير - أشك أصلاً فى ذلك - .. مدت يدها لعلبة مناديلها وكأنها على وشك البكاء .. نظرتُ إليها مصدوماً لكنها لم تُطل من صدمتى فألقت

بالقاضية في وجهي :

- إنت عايز تسييني يا أحمد ؟ .. بعد الحُب اللي حبيتها لك ؟ .. بعد كل السنين دي سوا وفضلت مستنياك ومستحمله عصبيتك .. أهو أنتو كلكو كدا تاخدونا لحم وترمونا عضم ..

هنا لم أستطع منع نفسي فألقيت بكوب العصير في ماء النهر .. نظر إلى كل من بالنادي وأنا أصرخ في وجهها :

- أسيبك إيه يا متخلفه انتي ؟ .. حد جاب سيرة إني اسيبك ؟ .. أنا مش عارف انا متتيل بحب فيكي ايه اصلا ؟ .. بصي يا هبله من الآخر كده قولي لأبوكي إني جاي أشرب معاه الشاي يوم الخميس إن شاء الله ..

ارتسمت أمارات الحيرة على خلايا وجهها .. صمت دهرأ ونطقت كُفراً كما يقولون :

- هنهزر يا أحمد ؟ .. انت مبتحبش الشاي أصلا ..

وصفيتها

"

شرح الشك أصعب من كسر البعد

"

أحمد و صفيه

- 8 -

جلسنا كعادتنا على المنضدة المواجهة للنهر .. كانت تشربُ عصيرها في تلذذٍ
فيما تشاغلُتُ أنا بالعبث بهاتفى المحمول .. وضعت كوبها فجأة ثم قالت :

- أحمد ..

أجبتها دون أن أنظر إليها مُنشغلاً بهاتفى :

- نعم ..

- أقول لبابا فعلاً إنك جاى الخميس ؟ ..

- قوليله ..

- بس أنا خايفه إنك تحس إنك اتسرعت شوية ..

- متقوليلوش ..

- بس أنا هموت ونتخطب بقى وأكتب على الفيس إنى اتخطبتك قدام
الناس كلها ..

- قوليله ..

- بس لا أنا هديك فرصة تتأكد من مشاعرك ليا ..

- متقوليلوش ..

- أحمد هو إنت مشغول فى إيه كدا ومش مركز معايا ؟ ..

- قوليله ..

- لا از ااااااى ؟ .. أهووووو .. ابن خالتى هناك أهو مكلمه من 3 سنين تقريباً .. كمان عندك واحد صاحبى لسه مكلمه من ربع ساعة أهو حتى شوفى ..

- صاحبك دا ايه ؟ .. دانت بتقوله معلى غصب عنى كلمتك غلط .. إحنا هنهزر ؟ .. ايه البنات دى كلها ؟ .. البنات دى كلها تتمسح فوراً ..

- نعم ليه إن شاء الله ؟ .. لا طبعا .. لا يمكن ..

- أحمد .. يتمسحوا حالاً ..

أمسكت بهاتفى وأنا أكاد أبكى .. خسارة .. مى بنت أخت مرات عمى ..

بلوك .. كانت واعدانى إنها تعرفنى على مىرا جارتها المزه فى الدور الرابع .. ملكيش نصيب يا مىرا .. إسرائ .. روعا .. حبيبة قلبى .. مكانتش بتسيبنى لما أنزل إسكندرية .. البنية ممكن ترمى نفسها من فوق قلعة قايتباى لو عرفت إنى عملتها بلوك .. نرمى .. لا لا لا .. كله إلا نرمى .. دانا صوباعى يتقطع من لغوغه قبل ما يعملها بلوك .. دانا أقفل الفيس ولا أعملها بلوك .. نرمى ؟ .. دى نرمى دى حته مارون جلاسيه منقوعه فى شيكولاتة نوتيلساايحه .. لا لا لا يمكن ..

أدرت وجهى ناحية صفيه ثم قلت فى عصبية :

- بنات مش ماسح .. خطوبة مفيش .. أبوكى متقوليلوش .. يقطع الجواز على اللى عايزين يتجوزوه يا شيخه .. علشانك يا نرمى .. صفيه تزعلها يومين ..

جاريها حتى فى هبلها .. واحدة واحدة هى هتعقل ..
هتقولى ولو معقلتش ؟..
ربنا يتولاك بقى .. أنا مالى أنا ..



فلاش محمد و صفيه

- 9 -

" حتى لو عزمتمنى فين مش هسامحك بسهولة بردو " .. قالتها وهي تلتهم آخر قطعة من البيتزا "الاكس لارج" بمنتهى البساطة .. لم تُصيها الثخمة كما توقعت بالعكس مسحت بقايا الكاتشب على شفيتها ثم بدأت فى احتساء المياه الغازية فى نهم .. يبدو أنها فكرت أن تُعطي معدتها قليلاً من الوقت حتى تقوم الماكينات داخلها بهضم كل هذه الكميات التي دخلت لتوها أو هكذا تصورت ففي نفس الوقت بدأ لسانها فى العمل :

- على فكرة أنا مش هعدى حوار البنات دا .. بس أنا بقى ليا طريقتى فى التعامل ..

- هتعلمى ايه يعنى ؟ ..

هزت كتفها فى بساطة ثم قالت بعد أن فرغت من احتساء ما تبقى من المياه الغازية تماما :

- هكلم ولاد ..

نظرت إليها فى استنكار و غضبٍ شديدٍ ثم قلت :

- نعم يختى ؟ ودا إزاي إن شاء الله ؟ ومين هيسيبك تعلمى كدا بقى ؟ ..

- هكتب على الفيس شعر وخواطر وحلقات زى مانت بتعمل .. وهيبقى ليا معجبين ولاد وهيكلموني انبوكس .. ولما تسألنى مين دول هقولك ولاد أعمامى وولاد أخوالى ..

- تكتبى إزاي ؟ هو إنتى ليكى فى الكتابة أصلاً ؟ دا من إمتى دا ؟ ..

- ملىش فيها .. بس إنت هتعملنى ..

ضحكت ضحكاً هستيرياً جعل جميع من بالمطعم ينظرُ إلينا .. ثم قلت :

- الحاجات دى مش بتبجى بالتعليم .. ومش بالبساطة دى زى مانتى فاكراً ..

لصدمتى البالغة .. أخرجت من حقيبتها قلماً وكراساً ثم قالت فى تحفز :

- يلا متضيعش وقت ..

نظرتُ إليها نظرةً بلهاء .. كاد لسانى أن ينزلق وأنا أسألها :

- دا بجد يعنى ؟ ..

رأيتُ فى عينيها تصميماً أكثر من الذى رأيته عندما أرادت أن تتصفح حسابى الخاص على الفيس بوك .. لم يكن هناك مفر .. مُضطر إلى تعليمها أى شئ إذن .. أمسكت بالقلم وقلت :

- بصى يا صنف .. هنبداً بالخواطر الصغيرة دى .. فيه قاعدة فى العربى بتقول " التضاد يُبرز المعنى ويوضحه " ومتقوليليش فهمهانى .. أحفظيها كدا وبس .. مثلاً من كام يوم كتبت على الفيس " الصمت قمة

البلاغة " .. و متقوليليش إزاي .. على كمية اللايكس والكومنتات على الفيس بوك مقولكيش .. يلا وريني ..

أمسكت بالقلم قليلاً .. نظرت إلى شاردة قليلاً ثم أمسكت القلم وكتبت :

- الموت هو قمة الحياة ..

- نعم يختى ؟ .. يا ماما مش لازم يكون فيها قمة .. أهم حاجة التضاد فى المعنى مش فى اللفظ .. يلا فكرى فى حاجة تانية ..

- " النار والتلج .. الاتنين بيلسعوا " ، يعنى المبالغة فى الحاجة بتوقع ..

- يا عيبيبيبيبيبيبينى .. إيه الحلاوة دى يابت ؟ .. أنا بقيت صبى فى قهوتك يا معلم ..

ضحكت ملء فمها فى جذبِ طفولى .. نظرتُ إليها وقلت فى همس :

- بحبك ..

تورد خذاها كالمعتاد ونظرت إلى جملتها كأب ينظر إلى ابنه ليلة عرسه .. فضلتُ أن أطرق الحديد وهو ساخن فأكلتُ قائلاً :

- أنا نفذت شرطك أهو .. مسامحانى بقى ؟ ..

للمت أشياءها ثم وضعتها فى حقيبتها وانصرفت قائلاً :

- " يا مجرب الحنية .. دوق القسوة شوية " ..

- !!!

استحملها واسمعلها ..
سابت الدنيا كلها وحببتك إنت ..
وحقها عليك إنها لما تجرى عليك تلاقيك ..



فلاشيتي احمد و صفيته

- 10 -

وصلتُ إلى النادي كالمجنون .. بحثتُ عنها بعينيَّ في لهفة فوجدتها جالسة على منضدتنا المفضلةً تبكي في حرارةٍ بشحفةٍ يتخللها مسح دموعها بمنديل ثلثه نصفين ثم أربعة أرباعٍ و كأنها تأبى أن ترميه قبل أن تستخدم آخر نسيج جاف منه و ما أن لمحتني حتى بدأت في نوبة عويل هستيريةٍ جديدة كأنها رأَت صورة المرحوم في عزاءه .. قلتُ مخضوضاً :

- مالك يا صفية ؟ .. فى ايه ؟ .. سر عتيني فى التليفون ..

- عاااااااااااااااااااا ..

اقتربت منها كاتماً قلتي وعصبيتي فى حين واحد خاصةً مع بدء التفات رواد النادي إلى بكاءها " المرسع " وقلتُ فى هدوءٍ هامس :

- صفية .. إهدى كدا يا بابا وقوليلى فيه يا حبيبى بس ..

- عاااااااااااااااا ..

كانت قد وصلت لنهاية النوبة و دخلت فى مرحلة الشحفة من جديد و تعذيب المنديل المسكين الذى ذاب تقريباً فى يديها .. لم أكن مُستعداً لذلك

فصرختُ فى وجهها :

- متنطقى يابت ؟ .. أنا هفضل طول اليوم أقولك فيه ايه وللا ايه ؟ ..

- صا صا صا .. عاااااااا .. صاحبتي آلاء .. عاااااااااااا ..

- مالها صاحبتك ؟ .. تعبانه ؟ .. انتحرت ؟ .. شالها قطر ؟ .. مالها ؟ ..

متفتیش .. متهریش .. علشان میکره کیش



فانتازیا
احمد و
صفیه

- 11 -

أهمسُ في أذنيها عبر الهاتف بكلماتٍ يُصيغها قلبي بمدادٍ من الهوى فتسرخُ هي
وسط حروفي حتى تُعانق السماء .. طلبتُ منها الانتظار لحظات ثم عُدت
إليها فسألتني :

- كُنت بتعمل إيه ؟ ..

- كنت بأزلى صُباعين محشى .. يا دى النيله ..

- فيه إيه يا أحمد ؟ ..

- مفيش .. كنت بزق الصرصار الرخم على الأرض .. تخيلي طالعى
على السرير كمان ؟ ..

صرخت صرخه أسمعتم جيرانها فنهرتها بقوة وقلت لها :

- وطى صوتك يا بت .. انتى اتجننتى وللا إيه ؟ ..

- مانت بتقول صرصار ..

- طب وايه يعنى صرصار ؟ .. هو أنا قلت تعبان وللا تمساح ؟ .. وايه
يعنى صرصار بيطير يعنى ؟ .. مش كائن حي بيتنفس وليه روح ؟ ..

كانت هي على وشكِ التقى لكنى لم أكن أعلم ذلك استجمعت شجاعتها
وقالت :

- يا حبيبي .. دى حشرة ولازم تموت يعنى ؟ ..

ذ
- يعنى ايه حشرة ولازم تموت ؟ .. هاتيلى سبب واحد يخلينى أموته وأنا
أموته حالا ..

صمت .. يبدو انها لم تجد جواباً معقولاً .. فسارعت أنا بالكلام :

- مش قلتلك .. بتتكلمى فى الهوا وبتفتى وخلص .. وبعدين حتى لو فيه
سبب .. مينفعش أموته ..

- ليه بقى ان شاء الله ؟ ..

- علشان دا صرصار غلبان وعنده عيال ..

- عنده ايه ؟ .. وانت عرفت منين ان عنده عيال أصلاً ؟ ..

- آه عنده تلاته كده لونهم بنى بس لسه صغيرين مش بيطيروا .. شفتم
دلوقتى فى المطبخ جوه حلة المحشى ..

-

محمد و
صفية

يا من تُطمئِنَ قَلبي حين أجزعُ
يا من تُهددين رُوحى حين أفرعُ
ويا من تفرشين لى حنايا صوتك حين أهجعُ
إن قَلبى تشربَ هواك حدَّ الارتواء



و صفيبه

- 12 -

الزمان : الثامنة مساء يوم الفالانتين .. المكان : غرفة صفية ..
تُحاولُ تقليب صفحات الرواية التي أهداها أحمد إياها .. ليست في حالة
قراءة .. تنظرُ بين الحين والآخر إلى هاتفها .. تتساءل لماذا تأخر في الاتصال
كل هذا الوقت .. عند دقائق الساعة الثامنة انطلق صوتُ هاتفها .. ظهر
على الشاشة " المجنون يتصلُ بك " .. أتاها صوتُ المجنون حازماً :

- اطلعى يابت فى البلكونة ..
- لا يا خويا .. جوزى محرج عليا ..
- جوزك مين يابنت الـ .. اخرجى يابت خلىنا نخلص فى ليلتك السوداء
دى ..
- ليلتى السوداء ؟ .. ليلتى السوداء فى الفالانتين يا أحمد ؟ .. طب مش
طالعه ..
- يابت متخرجى بقى .. خلىنا نقول البقين المحشورين فى بقنا علشان
نروح نكتبهم فى فلاش ونفقع بيهم السناجل .. دول مستنيين على نار
وكل شوية فى الفلاشات .. فى الفلاشات ؟ .. محسنى إنى بشتريها من
الجمعية الاستهلاكية ..
- نفقعهم .. أه إن كان كدا ماشى .. إحنا بردو بنحب الأذية .. حاضر ..
طالعه أهو ..

خرجت إلى الشرفة تبحث عن القمر في السماء تنتظر أن يسكب على مسامعها كلاماً يُدغدغُ حواسها بمناسبة الفالنتين لكنها قالت في استغراب :

- بس القمر مش كامل يا احمد ..

- يابنت هو أنا قلتاك تبصى للقمر ؟ .. بصى تحت .. أنا متنيل واقف اهو .. جايبلك ورد وجالاكسى .. إلهى يتمر ..

- معقوله ؟ .. ورد وجالاكسى .. بمناسبة إيه يعنى ؟ .. وكمان السببت بتاعنا حبله مقطوع ..

- بمناسبة إيه ؟ .. طب والله الراجل بتاع الورد قالى بلاش بينى هتقفلك دول يحبوا النكد زى عندهم .. قتلته لا صفيه غيرهم .. طلعت عبيط .. طب منتيش واخده حاجه يا يابنت تفيدة ..

- خلاص خلاص .. قولى الأول انت ايه اللى خلاك تيجى ؟ .. كان ممكن نتقابل وتديهملى ..

- ممم .. طب بصى للقمر .. القمر مش حلو بس علشان هو أبيض بلون حلو ولا علشان بينور الليل للناس زى مانتى منورة حياتى .. هو حلو كمان علشان هو عالى .. وأنا حببت النهاردة أقف تحت وأكلمك من هنا علشان تعرفى إنتى قد إيه عاليه و غالية عندى ..

كل سنة وانتى صفيتى ..

الجزء الثاني

فلاش باك احمد و صفيه

لو بتحبها حوَّش مهرها وخذ أبوك وروح لأهلها ..
اتفق مع أبوها ومتسمعش كلام أمها ..



فانجيلات
أحمد و
صفية

- 13 -

جلست أمامى بمنتهى البراءة ترتشف عصير المانجو بمنتهى الهدوء .. أنظر إليها فيما عيناها ككُرتين من البلور اللامع تنظران إلىّ فى ترقب .. قالت فى فضول :

- تكونش غيرت رأيك ومش عايز تيجى بكره لبابا ؟ ..

- لا يا صفيه مش كدا .. أنا كنت عايز بس آآآ

قطعْتُ جملتى وأنا أخرج من جيب قميصى ورقة مطوية .. أفردتها أمامها وأخرجت قلمى ثم قلت :

- اقرى دى كويس ولو وافقتى عليها أمضى تحت مكان الإمضاء ..

نظرت إلىّ فى ذهول فاغرةً فمها عن آخره .. نظرت إلى الورقة ثانية وقالت :

- كُنت حاسة .. عُرفى ؟ .. عُرفى يا أحمد ؟ .. دى أخرتها ؟ ..

- عُرفى إيه يا بت أنتى .. إنتى قرىتى الورقه أصلاً ؟ .. يارب أشكو إليك ..

- أو مال إيه الورقة دى ؟ .. القواعد العشرون ؟ .. إيه دا ؟ .. إنت ملخصلى الرواية بتاعة الراجل اللى اسمه أليف شفيق وللا إيه ؟ .. وليه عايزنى أمضيك عليها ؟ ..

- أليف وشفيق ؟ .. شفيق مين يا بت .. اسمها إليف شافاق واحده ست ..
وبعدين دول فى الرواية أربعين قاعدة تسخطيهم أنتى عشرين ؟ .. اقري
الورقة بدل ما أرميكى فى النيل بجد ..

القواعد العشرون لزواج صفيه من أحمد

1- مفيش فرح .. تقوليلى ده يوم مش هيتكرر فى حياتى وعايزه افرح ..
هقولك مش هدفع فوق الـ 25 ألف جنيه فى ساعتين علشان حضرتك
عايزه ترقصى سلو .. هنبقى نرقص فى البيت على my baby u ..

2- مفيش شغل .. تيجى بعد شويه تقوليلى زهقت من البيت هقولك
وحياة طنط ظاظا جارتنا المزه اللي ما بحلف بيها كذب .. مفيش شغل ..

3 - مفيش نيش .. قولى لأمك من دلوقتى .. ممكن بفلوس النيش نشترى
كتب ..

4- تكونى محافظه عالصلاة .. الصلاة مش أوبشن دا أساس فى الدين ..
مش معنى كدا انى محافظ عليها .. مكذبش عليكى انا على سطر وبسيب
سطر .. ربنا يهدينى وتكونى سبب فى هدايتى .. أو مال أنا متجوزك ليه
؟ .. مهو علشان تدخلينى الجنه يا روح تفيدة ..

5- احفظى معايا قرآن .. أنا بعرف أقرى كويس جدا الحمدلله بالتجويد
.. أنا أعلمك وانتى تشجعينى عال حفظ ..

6- متقوليليش إنى بلغى شخصيتك .. هنتناقش فى كل حاجه .. ولو
شايك إن رأيك أحسن هاخذ بيه .. بس لو أنا قلت حاجه يبقى خلاص ..
حتى لو أنتى شايكه أن رأيك أحسن من رأيى .. كلامى هيمشى بردو ..

7- عايزك تحبى أمى .. عايزك تكونى بنتها قبل ما تكونى مراتى ..
 حبيها زى أمك وأنا متأكد أنها هتحبك أكثر منى .. عايزه تشتكىنى لحد ؟
 .. اشتكىنى ليها .. هتجيبك حقك .. بس علشان خاطرى لما تشتكىلها
 تمشى على طول .. مبحبهاش تلسعنى قلم قدام حد .. حتى لو الحد ده هو
 انتى ..

8- مش هتروحي السوق ولا هتطلعى السجاجيد فوق السطح .. هعمل
 كل حاجة فى البيت ما عدا غسل المواعين خصوصاً فى الشتا .. بالنسبه
 للهدوم أغسليها وأنا أنشرها وألها كمان من عالحد .. اتفقنا ؟ ..

9- مفيش نيش ..

10- أسبوعيا ورق عنب .. وفراخ مرتين تلاته فى الاسبوع .. بلاش
 سمك علشان بيزهقنى .. لكن لو هتنضيفلى بصوابعينك اشطه و انسى
 الكوسه والبادنجان والبامية .. نهاللى ..

11- استحملى عصبيتى .. انا عصبى جدا وبتترفز بسرعه معلش ..
 استحملينى علشان نقدر نكمل .. والله لو صيرتى عليا ومش رديتى عليا
 هتلاقينى جاى ببوس راسك ..

12- عايزه أخرج .. الكلمة دى مبحبش أسمعها .. أنا كائن بيتوتى جدا
 .. لولا أن فيه ناس بتموت وبضطر أروح الجنازة بتاعتها مكنتش
 خرجت من بيتنا .. لو عايزه تاكلى بره .. تتعبى ليه ؟ .. مواصلات
 وزحمة .. فيه نعمه كبيره أوى اسمها الدليفرى .. يجيلك الاكل لحد عندك
 حتى نعمل سلطه بيتى مع الأكل ..

13- استحملى شكلى وصوتى وأنا صاحى من النوم .. شكلى بيبقى
 عامل زى الميكانيكى اللى الكاربراتير ضرب فى وشه وصوتى هو نفس

صوت شكمان العربية اللي الكارباراتير بتاعها لسه ضارب حالا .. لو مش عايزه تبصى لحد ما ادخل الحمام واسنجف نفسى مفيش مشكله ..

14- عندى التهاب مزمن فى الجيوب الأنفيه .. يعنى طول اليوم عطس وبرد وبلاوى .. تقويلي بقرف ومش هقدر أستحمل .. أنا كمان غصب عنى ربنا خلقنى كدا .. وبعدين دى نعمه .. يعنى ولا هشرب سجاير ولا شيشه ولا أى حاجة من الحاجات دى ..

15- الكورة قبل ثورة يناير كنت مدمنها بس دلوقتى لا .. ممكن نتفرج سوا .. زملكاوى بس مفيش مشكله إن عيالنا ميطلعوش بيحبوا الزمالك علشان ميجيلهمش ضغط وسكر .. بس لو حد حب برشلونة إسطه ..

16- مش هجبرك تتعلمى بلاي ستيشن .. لأنى ببساطة أنا كمان مبرفش .. متقلقيش ..

17- هغرقك شيكولاته .. بصى أنا مش هحلف بس أقسم بالله إنتى هتزهقى من الشيكولاته .. أنا أصلا من دلوقتى بشتريها علشان أهديها لحد تانى .. مش هجييلك أنتى ؟ ..

18- أدخل البيت موبايلك يتقفل .. الرغى مع صحباتك وأنا فى الشغل بس ..

19- وزنك لا يزيد فى أحلك الظروف وأقسى أنواع الاكتئاب عن 64 كيلو ..

20- مفيش نيش ..

إمضاء صافية

نظرت إلى وأخذت تتأمل ملامحي جيداً .. أمسكت الورقة ثانيةً وأعدت النظر فيها .. تناولت القلم ووضعت بين أسنانها .. يبدو أنها تفكر جيداً قبل التوقيع .. فكت غطاء القلم وشرعت في الإمضاء .. لكن قبل أن تكتب أى حرف من اسمها قلبت الورقة ثم أخذت تكتب بحماس كبير وأنا لازلت على استغرابي هذا .. انتهت بعد أكثر من ربع الساعة ثم وضعت القلم أمامي وعلى طريقة وكلاء النيابة قالت :

- إمضى انت الأول ..

نظرتُ إلى خطها العجيب وأخذتُ أقرأ مذهولاً ما كتبه ..

أنت كتبت قواعدك العشرين وأنا ساكون منصفةً معك تماماً .. سأعطيك ما تريد ولكنني أيضاً لى شروطى الخاصة .. وحتى أكون منصفةً معك أكثر ستكون قواعدى نصف تلك التى كتبتها أنت ..

القواعد العشرة لصفية

1- لو مفيش فرح يبقى فلوس الفرح نطلع بيها عمرة احنا الاتنين نبدأ بيها حياتنا بدل ما نصرّفها على الناس اللى هيجوا يقولوا الجاتوه كان وحش ويمشوا بعد ما شربوا البيبسى ..

2- مفيش شغل بس مرتبك أول ما تقبضه يكون فى إيدى .. منا مش هسيبك يا خويا تتحكم فى البيت وأنا لا حول لى ولا قوة ..

3- بدل النيش تكون مكتبه شيك وجواها مكان للـ Home theater

4- بطل نقار مع تفيدة ..

5- عايزنى استحمل عصبيتك يبقى كل ما تتترفز عليا تصالحنى باتنين شيكولاته واحدة ليا وواحدة ليا بردو .. أكيد مش هتجيبلك واحدة يعنى دانت اللي غلطان ..

6- حاول تساعدنى فى غسيل المواعين فى الشتا أو تشوف حد يغسلها لانا .. أقولك بلاها طبيخ خالص فى الشتا نقضيا دليرى ..

7- بالنسبة للخروج معنديش مانع إني مخرجش .. بس مفيش حاجة اسمها هخرج أشوف صحابى نتفرج على ماتش سوا ولو فكرت تروح هنا وللا هنا رجلى على رجلك ..

8- تكتب اقرار بكل الاكاونتس اللي عندك .. فيس بوك .. تويتر .. ياهو .. سكايب .. جوجل بلس .. حتى الجودريدز بباسورداتهم .. علشان الرقابة تشوف شغلها ..

9- ولادنا طبعاً مش هيطلعوا زمالكاوية .. أنا بخاف عليهم من الأمراض النفسية والعصبية .. الولاد لو حبوا الكورة بيقوا أهلاوية .. مبسوطين وفرحانيين كدا على طول .. وخليك إنت فى سنظل أوفياء واللى قادم بقوة دا ولسه مجاش تقولشى جاى راكب ظهر سلحفة ؟ ..

10- بطل نقار مع تفيدة ..

إمضاء أحمد

كُلُّهُ عِلْشَانِ عِيُونِكِ يَهون
 يَالِي خَلِيَّتِي فِحْبِكِ **مَجْنُون**
 عِلْشَانِ أَفْضَلِ مَعَاكِي هِتْحَمَلِ
 وَهَعَصْرُ عَلِي نَفْسِي اِتْنِينِ كِيلُو **لَمُون**



فلاش فلامن و صيفيه

جلسنا جميعاً في عُرفة الاستقبال .. هي ووالديها وأخوها الصغير وأنا وأبي وأمي .. كانت عيناى تنتقلان بينها وبين أيتها .. تنظرُ إلى الأرض في خجل أعلمُ تماماً أنها تتصنعه .. كنتُ أود أن أرفع صوتي وأنا أقول لها " عاملالى مكسوفه يختى ؟ .. الله يرحم لما جيبتك ميجا كوكيز أول مره كنتى بتلحسى الشيكولاته من عالورقه " .. فضلتُ السكوت من باب الستر على الولايا .. تركتُ أبي يبدأ الحديث مع أيتها عن الجوانب الأخرى من الزيجة .. طلب أبوها مهراً أربعين ألفاً .. كدتُ أن أصرخ في وجهه " لبيبييه جاي أتجوز ديان كروجر ؟ " .. فتحت أُمى فمها لتقول شئ ما .. أعتقد أنها كانت ستقول " مينفعش عشرين يا حج ؟ " .. هي لا تترك مثل هذه الفرص للفصال .. رد الفعل الأسرع كان من أبي الذى قال فى لهجة حاسمة قاطعة :

- المهر ثلاثين ألف يا حج .. هنشترى ذهب بعشرين ونكتب العشره الباقيين فى القايمه .. قلت إيه ؟ ..

سكتنا جميعاً ونظرنا إليه فى ترقب .. أوما برأسه إيجاباً وبدأ أنه وافق على هذا الاقتراح .. اعتدل فى جلسته ووجه نظره هذه المرة إلى قائله :

- طيب بالنسبة للفرح .. انت عارف يا أحمد بينى إن صافية أول فرحتى
ولازم أفرح بيها .. ولازم فرحها الناس تتحاكى بيه ..

كنت على وشك إخراج ورقة القواعد العشرين التي وقعت عليها ابنته لأقول
له ملء فى " بنتك ماضيه أهو على إنها موافقه ميكونش فيه فرح يا عم
برعى ولو مش مصدقنى ابعت هات خبير خطوط " .. لكنى تراجعث فى
اللحظة الأخيرة بدلاً من أن تنقلب الجوازة إلى جنازة وأظل أترحمُ عليها طيلة
حياتى .. ابتسمت ابتسامةً أوسع من ابتسامة اسماعيل ياسين نفسه وقلت
بهدوء :

- يا عمى أنا معاك إنك نفسك تفرح بيها .. وبغض النظر عن أول
فرحتك دى لأنى عارف أنك مجوز بنتين قبل كدا .. بس إحنا ليه
نصرف آلافات على فرح هيخلص فى ساعتين ؟ .. وتيجى الوليه أم
عباس اللي ساكنه فى آخر الشارع تفولك الجاتوه مكانش حلو وجوزها
يقول ليه محجزناش فى قاعه أكبر ويقول علينا بخلا لا سمح الله ..
هتبقى مبسوط ساعتها يعنى ؟ ..

كاد الشيطانُ بداخلى أن يمد يده إلىَّ قائلاً " عفارم عليك يا ض عرفت
أربى بصحيح " وأنا أقول كلماتي تلك مُتابعاً بدقة تغير تعبيرات وجه أمها -
تفيدة - عندما أتيت على ذكر أبى عباس وزوجته الذى كان على وشك
الانفجار وبدا وأن النار ستخرج من أنفها كتنينٍ غاضب .. لم أترك لهما فرصة
التردد أو التفكير فى أى اقتراحٍ آخر فواصلت :

- ممكن بقى بفلوس الفرح دى أخذها نعمل عمرة أو نطلع تركيا أسبوع
وللا حاجة .. قلتوا ايه ؟ ..

هز رأسه علامة على الموافقة فيما همت زوجته بإطلاق زغرودة ابتهاجاً لكنه
وضع أصبعه على شفثيه آمراً إياها بالصمت وقال :

- بس يا وليه .. مش وقته الزغاريد .. مش عايزين حد يعرف لحد ما
نعمل الخطوبة ..

ضحكتُ في نفسي وقلت داخلي " مش عايز مين يعرف يا حج ؟ .. دا
الشعب كله عارف إنى مأنتم مع بنتك .. دانت لو عرفت ان فيه جروبات
عالفيس ملهاش سيرة إلا أحمد وصفية مكنتش هتقول إلا يادى الفضيحة
أم جلاجل يا دى المصيبة أم حناجل " ..

صفية

أحلى مافى الصُّبح أنه طلع على صوتك
وأحلى مافى الشمس أنها واخده من دفا روحك



فلاشيك
أحمد و
صفيته

- 15 -

في تمام الساعة والنصف دقّ جرس المنبه في حزمٍ شديد .. كأنه يهوى أن يُوقظني مفزوعاً .. لا بأس .. أمسكتُ هاتفي وأجريتُ الاتصال بها حتى أوقظها .. لم تُجب إلا في آخر الاتصال الثالث .. بدا النومُ يتمل على لسانها وهي تقول :

- صباح الخير يا قلبي ..

أعلمُ أنها على وشك أن تسعل .. لم أكن أريد أن تضيع مُتعتي الوحيده عندما تستيقظُ من نومها فقلتُ في سُرعة :

- صفيه .. أوعى تكحى ..

ردت في استغرابٍ مُندهش :

- ليه ؟ ..

- علشان بعشق بحة صوتك وانتى صاحيه من النوم ..

- طيب يا خويا مش هكح لو هموت بس دعيتلنا وإنت بتصلى الفجر وللا نسيت ؟ ..

- طبعاً يا صفية دعيتلنا ..

- دعيت وقلت إيه ؟ ..

- يارب متحرمش منك فى الدنيا .. وفى الآخرة يارب متحرمش منك فى الجنة واتحرم منك لو أنا فى النار ..

- يلهوى .. إنت بتجيب الكلام دا منين ؟ .. دا لو حد قرى الكلام دا يا إما هيتشل يا إم هيشتم وفالحالتين هيتحسبن علينا ..

- مممم .. طيب بقولك إيه .. عايز أشوفك النهاردة ..

- أوك .. اتصل بابا وقوله عايز أشوف صفيه النهارده ..

- ماشى هكلمه عالضهر كدا .. يلا أنا هقوم ألبس علشان أنزل الشغل ..

اتصلتُ بأبيها فى حدود الواحدة واستأذنته فى الخروج مع صفيه فوافق ببساطةٍ لم أتوقعها .. عند تمام الرابعة طرقت باب منزلهم .. فتح الباب لى أخوها الصغير رفاعى .. كان مُرتدياً ملابسه وكأنه على وشك الخروج للقاء أحدٍ ما .. مازحته غامزاً ياحدى عيني :

- يا عم يا عم .. إيه الحلاوة دى ؟ .. رايح تقابل مين ياىض ؟ ..

رد بمنتهى البرود والسخافة :

- إنت هتهزر معايا ؟ .. أنا خارج مع صفية ..

ابتلعت برودته وسخافته على الرغم منى ثم أجبرت شفتى على الابتسام وأنا أقول :

- أصيل ياىض .. مأنتم مع بنت على اسم أختك .. يسهله .. بس أوعى تكون وحشه زى أختك كدا ..

- أنتيمتى اسمها يارا وبعدين إنت مالك حلوة وللا مش حلوة.. أنا خارج مع أبله صفيه أختى .. أنا خارج معاكو ..

- خارج مع مين يا حبيبي ؟ ..

قطع اندهاشى صوت صفيه من الداخل .. سألت أباها :

- مين يا ريفو اللي بيضرب الجرس ؟ .. دا أحمد وللا إيه ؟ ..

قلت مُتهكماً ساخراً موجهاً حديثى إليه :

- ريفو .. دا دلغ رفاعى ؟ .. محدش قالك إن ريفو دا اسم أسبرين ؟ ..

نظر إلىّ وقال بغضب بطريقة محمود المليجى فى أشد مشاهدته تخويفاً :

- متهزرش مع ريفو يا جميل .. اكسبنى فصفك متعادينيش ..

دفعته دفعةً خفيفةً من ظهره إلى الأمام وأنا أقول له :

- امشى يا ض أنجر .. أنت هتهزر معايا ؟ .. روح نادى أبوك .. معادش إلا العيال وللا إيه ..

قلت فى عقلى " رفاعى ؟ .. دا اسم دا ؟ .. بس منطقى بردو .. واحد

اسمه برعى اتجوز واحده اسمها تفيده هيخلفوا ولد يسموه إيه ؟ .. هيثم ؟ .. أكيد رفاعى " .. فجأ ارتقى على أرضية الصلاة ثم تلوى صارخاً :

- آه يا بطنى ... آآآه .. تعبان مش قادر ..

هرولت إليه أمه وصفيه فيما كان أبوه يمسح آثار النوم عن عينيه .. لم يكونوا قد رأوني بعد .. عندما وقعت أنظارهم عليّ في آنٍ واحد وأوشكوا على الترحيب بي لمحت الثعبان الصغير يضع سبابته في حلقه على حين غفلةٍ منهم ثم تقمق .. ليس هناك شكٌ أن أباهما رفض خروجها معي وحدها بدون أخيها .. لملت أذيتي وخرجتُ من المنزل بعد أن انتصر عليّ هذا الوغد ..

وبينما أنا أهبطُ درجات السلم أتتني رسالة على هاتفي المحمول من رقم غريب فيها " المره الجاية لو عايز تخرج معاها تجيب معاك اسطوانة بلاى ستيشن ترى وتقبل كل الدعوات اللى هبعتهالك للألعاب على الفيس بوك .. علشان تحرم تهزر مع ريفو يا جميل " ..

وصففيه

قَبْلِكَ كُنْتُ اللَّاشِئَ
وَكُنْتُ الْعَدَمَ
وَكُنْتُ السُّكُونَ
وَالآنَ أَنَا فَيضُ الْأَنْهَارِ
وَالْأَعَاصِيرِ
وَعَرَبْدَةُ الْجَنُونَ

فلاشيار
صيفيه

- 16 -

مُحادثة "شات" بين أحمد وصفية ..

- قولى يا أحمد .. بقالك فترة مكتبتش شعر .. اشمعنى ؟ ..
- مش عارف والله يا صفصف بقالى كام يوم مش فمود شعر .. بس كتبت امبارح بيتين شعر مخصوصين ليكى ..
- بجد ؟ .. طب ورينى ..
- لكِ وجنتان زهريتان كلما رأيتهما رُمْتُ لثمهما
ولكنى أخاف عليهما من شفتى أن يذهبا برحيقهما ..
- اطمئن لن يذهب رحيقهما بل شفتاك تزيدهما نضارة .. D:
- O: انتى انحرفتى وللا ايه يا بت انتى ؟ .. ايه الكلام دا ؟ .. عيب ..
- ههههههه بهزر .. مبهزرش يارمضان ؟ .. بقولك ايه ؟ ..
-
- أحمد ..
-
- أحماااااااااااا ؟ ..
- فيه ايه يا بت ؟ .. كنت بعدل الكرسي .. استنتيتك تقولى عايزه ايه ..
وللا لازم تقولى عايزه حاجه فأرد عليكى وأقولك قولى علشان تقولى ؟
.. استغفر الله العظيم يارب ..

- انت بقيت عصبى ونرفز كدا ليه ؟ ..

- يابنتى عليا النعمة ما عصبى ولا حاجه .. بالعكس أنا هادى أهو ..
حتى شوفى .. :D

- شفت بتتعصب ازاي ؟ ..

- اللهم طولك يا روح .. قولى يا حياتى عايزه ايه ؟ ..

- خلاص مش مشكله ..

- يادى النيله .. متنطقى يابت قولى عايزه ايه وخلصينى ..

- عايزة أقوم أشرب وآجى ..

كانت هذه المحادثة من أقوى الأسباب الفاعلة التي أدت إلى انتشار إشاعة
إصابة أحمد بالشلل الرباعى وما تتبعها من انتشار إشاعة محاولة انتحاره
بتناول السم ..

وصفيته

وعنيكى السحابة الوحيدة اللى محبتهاش
تمطر



صفية

- 17 -

اتصلتُ بها كثيراً .. بدأ القلقُ يُساورني .. أخيراً أجابت لكن بدلاً من أن
تنطق بحروفٍ مفهومة أتاني صوتها " عاااااااااا اهئ اهئ عاااااااااا " ..

- مالك يا بت ؟ فيه ايه عالصبح ؟ ..
- اهئ عاااااا .. الدنيا بتمطأااااار عاااااااااا ..
- طب وفيها ايه ؟ .. دا المطر خير .. بتعيطى ليه بقى ؟ ..
- اهئ عاااا عااااا .. اصل انا مش هعرف البس البلارينا التركوازى
الارضى على الشيميز البطيخى والجيبون القرمزى ..
- مين دول يختى ؟ .. قرايبكم اللي فى فهولندا رجعوا ؟ ..
- قرايينا مين يا احمد بس ؟ .. دا لبسى اللي كنت هخرج بيه النهارده
بس الشتا والطينه مش هيخلونى اخرج بيه ؟ ..

- طب مفيش حاجه فُحلقى طيب ؟ .. دا لبس ودى ألوان ؟ .. دا تلوث
بصرى يا حجه .. هى الناس بتتعمى من شويه ؟ .. احمدى ربنا انك
عندك اللبس دا اصلا وبعدين دا المطر خير لكل الناس .. دانا هخرج
الشغل بنفس لبس امبارح ومحدش هياخد باله انه مش نضيف بسبب
الشتا ؟ .. قولى الحمد لله ..

- الحمد لله ..

- يلا اطلعى فالشباك عايز اشوفك دلوقتى وانا معدى رايح الشغل ..
عايز اجمع الخير كله .. عينيكى والمطر ..

حلوةً كلماتي لأنها فيك
ولولاك ما حلت كلماتي
يا من ملكتي قلبي برضاهُ
وأنسيتيه كل ما فات
وسلبتي روحى بهدوءٍ
حارت فيك الكلماتُ
أهواك هوى يذهبُ العقلَ
فهيهات أعودُ عاقلًا هيهات

صفيته

- 18 -

كعادتها تماماً لم تُجِب اتصالي للمره السابعة .. فى المرة الثامنة ردت .. سبقتنى إلى الغضب والسخط وكأنها تُطبق المثل " خدوهم بالصوت ليغلبوكم " .. كانت حائقةً إلى حدٍ بعيد .. تدمرت وتأفأت وزفرت ألف مره .. صرخت فى الهاتف قائلاً :

- فيه إيه يا أنسه .. هتطيرينا بالنفخ دا .. مبترديش ليه بقالك ساعة ومتترفرزه ليه يختى ؟ ..

- زهقت يا أحمد .. قرفت .. مبتقتش طايقه خلاص ..

كان صوتها مكتوماً بطريقة غريبه فسألتها :

- مالك كدا يا بت ؟ .. مخنفه ليه كدا ؟ .. جالك برد وللا ايه ؟ ..

- لا دانا حاطه مشبك فى مناخيرى علشان أقفلها ..

- حاطه مشبك فى مناخيرك ؟ .. يخربيت الهطل .. ليه ؟ .. بتبشرى بصل وللا ايه ؟ ..

- لا بغير للواد صلاح ابن اختى كريمة .. ريحة الإي إى بتاعته صعبه أووووى ..

كُنْتُ على وشكِ التقى .. أغلقت الاتصال دون استئذانها حتى .. مُتخيلاً شكل ولون ورائحة " الإي إى " بتاع سيادته .. بعد نصف الساعة اتصلت

هي بي .. قالت وصوت أبو صلاح يُدوي كسيفونية نشاز في بئر سُلم مبنی
مُهجور :

- معلى يا حبيبي .. غصب عنى .. هعمل ايه بس ؟ .. أمه سابتهولى
وخرجت تعمل حاجة ولسه مرجعتش .. معلى سامحنى ..

- ولا يهكم يا صفص .. المهم الواد ايه نظامه دلوقتى ؟ ..

- هو صحيح بيعيط بس عسل اوووى يا احمد .. واد طرى كدا بحط
صابعى فى وسط ايده كدا فيلفها حواليه ببراءه .. ولما بيضحك كأنه
ملاك بيضحك ..

- عقبال يا حبيبتى ما تجيبلى عُكاشة الصُغير .. وأدله وأقوله يابو
العكايش ..

أُخيلُ وجهها المذهول وقد صار أحمرأ كسارينة الاسعاف عندما قلت أبو
العكايش هذه .. لم تنطق بحرفٍ واحد فيما ضحكت أنا لنجاحى فى
استفزازها .. قلت من وسط ضحكاتى :

- خلاص خلاص .. أبو العكايش ايه بس ؟ .. بس ربنا يكرمنا بس
واحنا نسويه أى اسم حتى لو هنسميه بُلص .. اسم جديد وسينمأى كدا
ومفيش منه اتنين ودلعه أبو البحاليص .. ويعمل دويتو مع أبو صلاح ..

- أحمد .. أنت بتتريق على ابنى ؟ ..

- يابت ما هو ابنى أنا كمان .. انا بدعى ربنا يرزقنى بأى حاجة منك يا
صفيه .. حاجة فيها منى ومنك .. فيها عصبيتى وطيبتك .. فيها ملامحك
واسمى .. فيها عنيكى ومناخيرك علشان مناخيرى كبيرة شويتين ..

- آه فعلا يا ساتر .. دى مناخير دى وللا فتحة ساكسفون ؟ ..
- هنتريق بقى ؟ .. بلاش اتكلم على شفائفك اللي عاملة زى قلاب التروسىكل .. خلينا نبطل تشريد فى بعض ..
- ماننت عايز تسمى الواد حبلص .. عايزه يطلع معقد أصلا ..
- هو كدا كدا هيطلع معقد .. جده برعى وجدته تفيده وخاله رفاعى .. دانتي تحمدى ربنا لو وقفت على معقد دى ..
- صمت قليلاً .. سمعتها تُهدد صلاح الصغير فى حنو .. تخيلتُ شفيتها
- تُتمت بانغامٍ رقيقةٍ تُطمئن الصغير .. يبدو أنها نسيت أنى كنتُ أحداثها ..
- أغلقتُ الاتصال وتركتهما يسبحان سوياً فى عالمها البرئ الخاص ..

حمد و صفيته

أغوى ماجن أشبيلية المعروف بالدون جوان
أكثر من ألف امرأة وجعلهن يبكين ليل نهار
وعندما أحب فعلاً .. أحب امرأةً مخطوبةً ولما
أراد لقاءها ذات مرة .. رآه خطيبها وقتله ..
حد يقولى إيه لازمتهما الحكاية دي ؟ .. أقوله
معرفش بس أنا ملقيتش فاصل أكتبه بصراحة .



وصفيته

- 19 -

قُمتُ بجلبِ لغزِ جريمةٍ في " كريمينال كيس " وتدريب فريقِ المجد في " توب مانيجر " واجتيازِ مستويين في " كاندى كراش " وبناءِ طاحونةٍ وشراءِ بقرةٍ في " المزرعة السعيدة " .. أصبحتُ كالعبدِ كلما جاءني إشعارٌ لقد دعاك " ريفو بورا " إلى الانضمامِ إلى لعبةِ كذا على الفيس بوك ..

هذا الفأر جعلني أفعل ما لم أفعله طيلة عشر سنوات على الفيس بوك .. وقبله كنتُ أحتدُّ على أصدقائي الذين يدعوتني إلى مشاركتهم هذه الألعاب السخيفة .. أسبوعٌ كاملٌ ظلَّ يجرنِي وراءه في كل الألعاب مُستفيداً من النقاط التي تُضاف إلى رصيده في تلك الألعاب لأنه جرَّ غرّاً ساذجاً جديداً إلى شباكها .. لكن لا .. لا بُدَّ من وضعِ نهايةٍ لهذه المهزلة .. أصدقائي صاروا يتهكمون عليَّ كلما شاهدوا إنجازاً لي في إحدى هذه الألعاب .. لقد حولني هذا الفأر الصغير إلى أضحوكة .. حتى الآن لا أجد مفرّاً سوى تلبية رغباته السادية تلك .. كلُّ هذا دار في رأسي وأنا أقفُّ في محلِّ بيعِ اسطوانات الألعاب المُدمجة .. كنتُ على وشكِ البكاء وأنا أدفعُ ثلاثين جُنيهاً ثمنَ لعبةٍ فيفا 2015 الجديدة تنفيذاً لأوامره .. فعلتُ له ما لم أفعله من أجلى أنا

شخصياً .. اتصلتُ به وأخبرته أنى قادمٌ فى الطريق أحملُ له ما " أمر " به ..
عندما فتح الباب لى مد يده إلیّ فهمتُ بمصاحته لكنه لم يُصافحنى وقال :

- لا .. بقولك هات الاسطوانه .. أسلم عليك ليه ؟ .. إنت هتصاحبنى ؟ ..
جازاً على أسنانى حتى كدتُ أن أُحطمها قلت :

- اتفضل يا سيدى .. تحت أمرك .. بس ياريت تكون جاهز علشان ننزل
بقى .. فىن أختك ؟ ..

هنا جاء عم بُرعى يدعونى للدخول ريثما تنتهى صفيه من ارتداء ملابسها ..
نظر إلى الاسطوانة فى يد ابنه ثم قال :

- بينى ليه التعب والتكاليف دى ؟ .. مكانش ليها لازمه الاسطوانه دى ..
كنت على وشك أن أقول " حُكم القوى هنعمل ايه ؟ " لكنى ضحكْتُ
ضحكَةً مُزيفة وقلت ناظراً إلى الفأر الصغير :

- لا يا عمو متقولش كدا .. دا ريفو حبيبي .. هو فيه ولاد زيه كدا
اليومين دول ؟ .. دا حتى جدع ومحترم ..

- الله يخليك بينى .. دا بس من ذوقك ..

انتهت صفيه من ارتداء ملابسها ثم هبطنا سوياً أنا وهى ورفاعى درجات
السلم .. عند مدخل العمارة مددتُ يدي لأمسك بيدها دون أن أنظر إليها

.. بدا ملمس يدها أنعم كثيراً من المعتاد وأصغر حجماً .. نظرتُ إليها فوجدت
الرفاعي مُمسكاً بيدي بدلاً منها ناظراً إلى بنظرة مُتشفية وقال :

- أصل بابا قابلي أمشى فى النص ..

كانت ابتسامته لزجةً إلى أقصى درجة .. ضحكت صفيه حتى القهقهه ..
نظرتُ إليها مُغتاظاً ثم نظرتُ فى ساعتى .. كُنت على وشك الاشارة لسيارة
أجرة لكنى تراجعت .. سرنا قليلاً فى شارع مُجاور وعند أحد المحلات
توقفنا .. طلبتُ من صفيه أن تنظرنا قليلاً ثم قلت له :

- تعالى يا كابتن هنجيب حاجه نسيتهها من صاحبي جوه المحل دا ونرجع
على طول ..

سار معى بهدوء .. دخلنا المحل وصاحت صديقى كريم الذى مال على أذنى
هامساً :

- دا الشيطان ؟ ..

أومأت برأسى أنظرُ إليه .. كانت عيناه قد اتسعتا تماماً كأنه تحت تأثير التنويم
المغناطيسى .. أدار رأسه وسأل كريم :

- هو دا بلاى ستيشن 4 ؟ ..

ابتسم كريم بعد أن ابتلعت الفريسة الطعم وقال :

- آه واللى شغاله دى لعبة .. Pes 2015

كان الإنهار قد ملأ الشيطان الصغير فقال مسحوراً :

- طب ممكن أجرب ؟ ..

مد كريم يده بذراعات الجهاز إليه فيما وقفتُ أنا قليلاً حتى بدأ يلعبُ مباراةً
ثم قلت :

- يللا يا ريفو علشان نمشى .. أختك واقفه فى الشارع وهنتأخر ..

أجابنى دون أن ينظر إلى مُنهمكاً فى مباراته :

- روحوا أنتو .. أنا هستناكوا هنا .. بس متتأخروش ..

- لا مينفعش .. إزاي أمشى مع أختك لوحدنا كدا ؟ ..

- لا ميهمكش .. روح روح .. أنا واثق فيك ..

خرجتُ من المحل دون أن يشعر بى وذهبتُ إلى صفيه .. أخبرتها بكل ما
حدث فكادت أن تسقط أرضاً من الضحك فقلت :

- مُستعد أعمل فيه مقلب كل يوم علشان أشوفك بتضحكى كدا ..

ابتسمت خجلةً ثم سرنا إلى المطعم .. تناولنا عشاءنا بهدوء ودون تنغيص من
الفأر الصغير .. بعد أن انتهينا عُدنا إلى المحل .. وجدته كما تركته تماماً .. لم
يتحرك من مكانه ولو للميتر واحد .. كان مُستاءً جداً حتى أنه قال :

- إيه يا عم .. أنتو جيتوا بسرعه كدا ليه ؟ ..

- معلش يا ريفو بقى علشان بابا ميشدش علينا ونعرف نخرج تانى ..

أدار الأمر في رأسه ويبدو أنه حسبها جيداً .. فطلما أنا أخرج مع صفيه
فستسمح له الفرصة للقدوم هنا مراتٍ أخرى .. وصلنا إلى المنزل واستقبلنا
عم برعى .. سألتني عن سلوك رفاعي فأخبرته أنه كان مُهذباً إلى أقصى درجة
وكان رجلاً بمعنى الكلمة .. دخلت صفية غرفتها كي لا تفضحنا بضحكها
الهيستيري .. اقترب مني رفاعي وقام بأغرب تصرفٍ مُتوقع .. عاتقني بقوة
وقال " أنا بحبك أوى يا أبيه أحمد " ..

أحمد و
صفية

الجزء الثالث

فلاش باك
أحمد و
صفية

الكذب ليس له أرجل لأنه ببساطة لا يحتاجها
فلديه **لسان** المرأة



زمانكم بتقولوا دلوقت :

انت بادئ الجزء الثالث اللي احنا مستنيينه من زمان البداية الصعبه دي ؟ ..

أقولكم آه وإن كان عاجبكم ...



" يا سلاالم .. أحلى حاجة فى الدنيا الأجازات دى " .. قُلتُ لنفسي وأنا
أتململُ فى سريري صبيحة يوم شم النسيم .. أتخيل شعور كل سمكة حزينة
بأئسة ألقى بها حظها التعيس على شواطئ المحروسة لتتلقفها شباك الصيدين
ثم يتم تمليحها حتى التعفن من أجل آكلى الفسيخ الشرهين فى أشع جرائم
الإنسانية تجاه المخلوقات البحرية .. أمسكتُ بهاتفى لأجرب الاتصال بصفية ..

- ألو .. صباح الخير .. عامل إيه يا سُكر أنت ؟ ..

- صباح النور يا أحمد .. أنا الحمدلله وانت عامل إيه ؟ ..

- حمدلله يا صفصف .. إيه .. يومك إزاي ؟ .. هتخرجوا النهارده ؟ ..

- لا مش هنخرج .. هنتغدى فى البيت وبليل هنروح نزور أختى ..

- هتاكلى فسيخ ؟ ..

وكأنى شتمتها بأقذع الألفاظ أو كأنها رأت مشهداً مُثيراً للغثيان .. قالت
بصوت عالٍ :

- ايبيبيبيبيف .. ياااااااااااااااا .. فسيخ إيه ؟ .. متجيبيليش سيرته .. بطنى

بتوجعنى لما بسمع اسمه .. دانا مبطبقش ريحته أقوم أكله ؟ .. لالالا ..

مش عارفه بياكلوه إزاي دا ؟ .. حاجة صعبه أووووى ..

- بجد مبتحبيهوش ؟ .. طلعتى بتفهى يا بت يا صفص .. طب هتاكلى
ايه طيب ؟ ..

- قلت لماما تجيلى تونه دايت .. أحمد .. الفسيخ دا عمره ما هيدخل بيتنا
أبدأ .. مفهوم ؟ ..

- طبعاً يا حبيبتى .. من غير ما تقولى .. يلا هقوم أنا أفوق وأكلمك
بعدين .. سلام دلوقت ..

عند الرابعة تماماً أتى صوت هاتفى مُنبأً بِمُكالمة من صديقى محمد الطيب
المقيم بِمُستشفى التأمين ..

- أبو حميد .. سلام عليكم .. عامل ايه يا برنس ؟ ..

- و عليكم السلام يا محمد .. أنا تمام الحمد لله وانت عامل ايه يا حج ؟ ..

- الحمد لله تمام .. أنا بتصل بيك مش عارف أنت عرفت وللا لا ..

- خير يا بنى فيه ايه ؟ ..

- يبقى متعرفش .. عالموم أبو خطيبتك هنا فى المستشفى قلت أقولك ..

- أوووووبس .. تلاقى طنط ضربت فسيخ أصلها بتحبه أوى وتلاقيه كان
بايظ وللا حاجه ..

- لا طنط كويسه وزى الفل .. دى حتى قالتلى انها مبتحيش الفسيخ ولا
الرنجه حتى ..

- يبقى رفاعى .. رغم أنه عفريت بس تلاقى بطنه مستحملتش ..

- آه هو فعلا عفريت .. مجنن الممرضة من الصبح وقافش ياخذ منها
أنبوبة مطاط يعمل بيها نبلة .. بس مش هو بردو .. صفية هي اللي
تعبانه وقالولى انها هي اللي ضربت الاتنين كيلو فسيخ لوحدها ..

-!?!?!..

فلاشات أحمد و صفيه

ثُبِتَ بالتجربة العملية على مدار السنوات السابقة أن المُعَوَّقات والمُغْرِيات لا يجتمعن إلا أمام **الطالب المصري** في مُحاولَةٍ جادة لإثناؤه عن تحقيق حلمه أثناء فترة الامتحانات ألا وهو

" **يعدى المادة بس** "



صفيفة

تملمت في سريرها على صوت المنبه الذي ضبطته بالأمس على الساعة صباحاً .. ضغطت زر تأجيل ثم نامت ثانية .. بعد نصف الساعة عاد المنبه لإيقاظها من جديد .. ضغطت زر الإيقاف ثم أخذت تنظرُ إلى سقف الغرفة .. " عيب بقى كدا .. معادش ينفع المسخره دى .. لازم تذاكرى بقى .. دا الامتحان بعد بكره " .. قالت صفيّة لنفسها وهي تتأملُ عنكبوتاً في زاوية السقف يأكلُ ذبابةً وقعت فريسةً في شبابه .. أخذت تُتابع التهامه لفريسته في نظرة لا شعورية لنصف ساعة أخرى .. فجأة انتفضت .. " احنا هنستهبل .. متفوقى بقى .. المفروض الساعة اللي فاتت دى تكونى ذاكرتى فيها فصل على الأقل " .. قالت في نفسها ايضاً .. أمسكت منشفتها في حماس كبير ثم دخلت الحمام .. غسلت وجهها ثم عادت إلى غرفتها .. جلست إلى مكتبها .. " أبدأ بايه ؟ .. اقتصاد وللا ادارة وللا محاسبة " .. أخذت تُعدّد مميزات ومساوئ كل مادة لمدة نصف ساعة ثم نهايةً حسمت أمرها .. "اقتصاد" .. أمسكت بكتاب الاقتصاد وفتحته .. " لا الاقتصاد عايز

حفظ ولازمه دماغ متكلفة .. انا أعمل نسكافيه وارجع أهرسه " .. قامت الى المطبخ لتعد النسكافيه الساخن .. " دى النيلة .. مفيش سُكر .. هى إيه الحكايه ؟ .. كأن الكون كله متآمر ضدى علشان مذاكرش النهارده .. بس لازم أعدى الصعاب وأتجاوز كُل المَحَن .. هشربه من غير سكر .. حتى مُفيد للدايت " ..

أخيراً جلست إلى مكتبها .. رائحة النسكافيه الساخن تتسلل إلى المُخِيخ .. مع آخر قطرة من مشروبها الساخن ارتفع صوت أذان الظهر .. " لا .. لازم أصلى الاول علشان ربنا يكرمنى كدا وأعرف أذاكر " .. توضأت ثم أدت صلاتها وعندما انتهت ولازالت على سجادة الصلاة رفعت يدها بالدعاء " يارب حنن قلوب الدكاترة علينا " .. كررته ثلاثاً ثم قامت إلى مكتبها .. من الخارج صوت رفاعى يُشاكس أمه التى كانت تُشاهدُ برنامجاً مغربياً للطبخ لا تفهم منه شيئاً بينما يُريد هو أن يُشاهد إعادة الحلقة الأولى من " آراب جوت تالنتس " .. لم تكن قد شاهدتها بالأمس .. " مش مشكلة ساعه الا ربع يعنى .. انا أشوف الحلقة وارجع بقى فى حيوية ونشاط ويكون بالى مش مشغول .. انا أصلا مش هبقى مركزه والحلقة شغاله بره " .. شاهدت الحلقة التى امتدت للساعة تقريباً .. " أيوه بقى .. جياالك يا اقتصاد .. دانت هنتهرس .. اصبر عليا " .. عندما مرت على المطبخ

نادتها أمها لتناول طعام الغداء .. " أيوه أنا أصلا مش هعرف أذاكر من غير ما أكل .. لازم الدم يكون متغذى كويس علشان يوصل للمخ ويعرف يركز .. ناكل الأول " .. فرغت من تناول طبقين من الأرز وطبق سلطة وطبق البازلاء وقطعتي لحم .. " الحمدلله .. تمام كدا .. آخذ بقى البيبسي الدايت بقى وأركز " .. ذهبت إلى غرفتها حاملة مشروبها الغازي .. نظرت إلى الساعة التي أشارت إلى الثانية والنصف .. " مممم .. لسه عشر دقائق بس عالعصر .. أنا أبص على الفيس لحد ما الأذان يأذن علشان أصلى وبعدين أذاكر إدارة .. مهو خلاص كدا وقت الاقتصاد خلص " .. أمسكت بهاتفها وبدأت التصفح .. أول ما رأت - كريمة تمت خطبتها إلى عبدالسميع - .. وقبل أن تقوم بالمباركة لصديقتها .. ضغطت على بروفایل عبدالسميع وقلبت جميع صورة الخاصة والعامة وكل ما كتبه من منشورات .. عبد السميع يعمل مهندساً في السعودية .. قامت بالتعليق "ألف مبروووك يا كوكوووووو .. عقبالى بقاااااا عاااااااااا" .. ثم بدأت محادثة "شات" مع صديقتها سعدية ..

- سوسو .. شفتى بنت المحظوظه .. كريمة .. خطيبها شغال مهندس فى السعودية ..

- عاتى عاتى .. تلاقىها ضحكت عليه .. مانتى عارفاها مسهوكة ..

"

يوم الامتحان ..

يا تروح زعلان .. يا تروح بردو زعلان ..

"

فلاش زعلان
احمد و
صفية

- حاضر حاضر بس متشخّطش .. هكلمك وانا نازله .. سلام ..

قامت من سريرها تجر حُطّاهها .. نظرت إليها أمها وقالت :

- يلا خُدى دش على ما أجهزلك الفطار ..

لم تُجِبهَا صفيّة بل دخلت الحمام وفي عقلها تتداعى مئات الكلمات .. تضحك ..

انكماش .. سوق حر .. سعر الصرف .. رأسمالية .. شيوعية .. بامية ..

ملوخية .. " ياربناااا ايه اللي جاب الملوخيه والبامية فى الموضوع ؟ ..

دا اقتصاد مش اقتصاد منزلى " .. قالت فى نفسها وهى تخرج من الحمام

أشارت لها أمها بأن الطعام جاهز فأجابت :

- لا يا ماما مش هقدر .. مش جعانه ونفسى غامة عليا .. ولو كنت
ممكن أرجع ..

سقط طبق الفول من يد أمها على أرضية المطبخ وصرخت :

- يالالالالالالاهوووووى يا خرااa

استيقظ برعى على صوت زوجته الصارخ فسألها فى عُنْف :

- مالك يا تفيدة ؟ .. بتصرخى ليه يا وليه عالصبح ؟ ..

- تعالى شوف بنتك .. بنت الشرف والأصول بتقول ايه ؟ .. بتقول نفسها
غامّة عليها وعايزة ترجع ..

دون مقدمات أمسك أبوها بشعرها وهو يصرخ فيها بمنتهى الثورة :

- حظيتى راسنا كلنا فى الطين .. الشرف يابنت الكلب .. انطقى عملتها مع مين ؟ .. أنا لازم اقتلكم انتم الاتنين واغسل عارى بدمكم ..

هنا كان دور رفاعى الذى قال :

- أروح أجيب السكنينة يا بابا ؟ .. أنا عارف مين المجرم اللى عملها .. دا أكيد أبيه أحمد .. هو مفيش غيره ..

قالت صفيه بصعوبة وهى على وشك الاختناق :

- عن .. عندى .. عندى امت .. امتح .. عندى امتحاننااa

أفلتها أبوها من قبضته ببساطة وهو يقول كأن شيئاً لم يكن :

- مش تقولى يابنتى إن عندك امتحان .. خضيتينا ربنا يسامحك .. اغصبى على نفسك وتعالى كلى علشان تعرفى تحلى كويس ..

لملت المسكينة خصلات شعرها وهى تكاد تقتل رفاعى بنظراتها ثم قالت :

- fake أوى أنتو الثلاثة .. إيه جو الأفلام الرخيص دا ؟ .. مش هاكل ..

دخلت غرفتها وذكرى الكابوس تعود إلى عقلها من جديد .. شيئاً فشيئاً ..

اتضح فى عقلها ملامح مطاردها الذى لم يكن سوى الدكتور سعيد ..

دكتور الاقتصاد ..

”
التفاهم بيني والعند بيهد
”

فلاشيان احمد و صفيه

- 23 -

عندما استيقظت من نومها اتصلت بي .. تترق صوتها الرائع في أذني
كترققي الماء البارد العذب في جوف رجلٍ تائه في لهيب الصحراء .. أخذ
حديثها يميل شيئاً فشيئاً من الرومانسية الحاملة إلى "السهوة المنححة"
لكني طردت هذا الشعور من رأسي حتى قالت :

- أحمد ..

- نعم يا روح أحمد ؟ ..

- أنا هروح الفرح بليل مع بابا وماما ..

- منا عارف .. مانتى قايلالى بليل ..

- لا مهو أنا عايزه استأذنيك في حاجه ..

- كُنت حاسس .. اتفضلى حضرتك .. أنا شامم ريحه مش تمام في
الاستئذان دا أصلا ..

- إحم .. إحم .. إحم .. إحم ..

- منتطقي يا بت على طول ..

- حاضر .. حاضر .. عايزه أسيب شعري ..

-

تيت تيت تيت .. أغلقت الخط في وجهها لكنها في نفس اللحظة عاودت
الاتصال .. فأجبت بمنتهى الغضب :

- نعم ؟ .. عايزه ترقصى فى الفرحة معاها كمان ؟ ..
- يا أحمد مفيهاش حاجة يعنى .. وبعدين دا فرح أنتيمتى وليلة واحدة
مش هتضرر ..
- أبقى قوليله سيبت شعري ليلة واحدة مش هتضرر يعنى ..
- هو مين اللي أقوله ؟ ..
- ربنا .. قوليله كدا .. ردى عليا يا آنسه .. حرام تسيبي شعرك بره
البيت وللا لا ؟ ..

.....

- سكتى ليه ؟ .. ردى عليا .. حرام وللا مش حرام ؟ ..
- أيوه يا أحمد .. حرام ..

- ربنا لما قال " **يَا أَيُّهَا النَّبِيُّ قُلْ لِأَزْوَاجِكَ وَبَنَاتِكَ وَنِسَاءِ الْمُؤْمِنِينَ يُدْنِينَ
عَلَيْهِنَّ مِنْ جَلَابِيبِهِنَّ ذَلِكَ أَدْنَى أَنْ يُعْرَفْنَ فَلَا يُؤْذِينَ وَكَانَ اللَّهُ غَفُورًا
رَحِيمًا** " مقالش بس لو رحتوا فرح أناتيمكم ممكن تقلعوه أصل ليله
واحدة متضرش يعنى .. صح ؟ ..

- صح يا أحمد ..

- مينفعش نرتكب ذنب يا صفيه علشان لحظة سعادة عابرة .. وبعدين
مين قال إن الفرحة فى شعرك اللي باين للناس ؟ .. الفرحة جوه قلبك لما
تشوفى فرحة اللي بيحبوكى وبتحبهم .. أما غير كدا متبقاش فرحة ..

وبعدين إيه الأولى ؟ .. تبقى أحلى قدام ربنا وللا أحلى قدام الناس ؟ ..
مين اللى بتدعيه لما بتحتاجي حاجه ؟ .. ربنا وللا الناس ؟ ..

- حاضر يا أحمد عندك حق .. هلبس طرحه ..

- شاطره يا صفيه .. أحبك وأنتى عاقله كدا .. إلا قوليلى يا صفصف ..
مش أنا قلتلك ورينى صورة الفستان اللى هتروحي بيه النهارده ؟ ..
موريتهونيش ليه ؟ ..

- ها ؟ .. مهو .. مهو .. أصل .. !!!!!!!!!!!!!!! !؟! ..

- أهلا .. أصل إيه يا آنسه ؟ .. اتلخبطتى ليه فجأة ؟ ..

- أصله كان فى المغسلة يعنى يا أحمد امبارح فمعرفةتش أصوره ..

- طب أظن النهارده جه يعنى ؟ .. وللا هيبات هناك ليلتين كمان ؟ ..

- آه يا أحمد جه ..

- طب ممكن أشوفه حضرتك يعنى ؟ .. دا لو ميدايقش سعادتك ..

- إحم .. حاضر .. ثوانى ..

دقيقة واحدة وبعثت إى بالصورة ..

- استغفر الله العظيم يارب .. يابت عيب الكلام دا دلوقت .. مصورالى
قميص نوم قبل ما نكتب الكتاب ؟ .. اعقلى يابت وورينى الفستان ..

- أحمد يا حبيبى .. هو دا الفستان ..

- نعم يختى ؟ .. دا الفستان ؟ .. فستان دا وللا بيبي دول ؟ .. دا يدوبك
عند الركبه ..

لكننى وجدت نفسى عند تمام الساعة السابعة اتصلُ بها .. اتصلتُ عدة مرات قبل أن تُجيب :

- اتأخرتى فى الرد عليا ليه ؟ .. بتلبسى وللا ايه ؟ ..

أجابت بصوتٍ مُختنقٍ هادئٍ كمن هى على وشك البكاء :

- ألبس إيه ؟ .. مش انت قلت متخرجيش ؟ .. ماما وبابا استغربوا وفضلوا يزعموا وقعدوا يسألونى عن السبب فقتلهم تعبانه ومش قادرة أروح ..

- ميرضينيش متحضريش فرح صاحبتك .. يللا قومى ألبسى وروحي معاهم ..

- نعم ؟ ..

- ايه مبقيتيش بتسمعى ؟ .. بقولك قومى ألبسى وروحي معاهم ..

قالت وصوتها يكادُ يرقصُ سعادةً وطرباً ..

- بجد يا أحمد ؟ .. حاضر .. أنا بموووووووت فيك ..

- استنى مش بالبساطه دى .. فستانك دا متقريبيلهوش .. انتى عارفه البلوزة الموف اللى عندك دى .. الواسعة أوى دى اللى تحسى إن تلاته ممكن يلبسوها مع بعض .. ألبسيها ..

- حاضر ..

- والجيبه بقى .. الجيبه السودا اللى بتجر فى الأرض دى وبتكنسى بيها الطريق وانتي ماشية .. ألبسيها بردو .. حتى تنضفى شارعكم وانتي ماشيه تكسبى ثواب ..

- أحمد .. مانا أخلع الستارة بتاعتنا وألفها حواليا وأروح بيها وأخلص .. حتى واسعه وتقبيلة وحشمة ..

- اسمعى يابت وانتي ساكته .. انتى هتهزرى معايا ؟ .. الطرحة بقى .. انتى طبعاً هتورينى الصور بعد الفرحة .. إياكى أشوف شعرايه طالعه منها يا صفيه يابنت تفيده .. فاهمه وللا مش فاهمه ؟ .. يللا قومى علشان تلحقى تجهزى ..

- حاضر يا أحمد .. ربنا يخليك ليا .. كنت عارفه إنى مش ههون عليكى تسببى زعلانه كدا ومروحش الفرحة دا ..

- ماشى يختى .. بقولك إيه ..

- نعم ..

- متصرفيش فى الفستان .. إحم .. علشان هنبقى نحتاجه فى يوم من الأيام يعنى ..

قُلْتِهَا وَأَغْلَقْتُ الْخِطَّ مُتَخِيلًا وَجْهَهَا وَقَدْ اسْتَحَالَ أَحْمَرَ كَالدَّمِ ..

الجيبه

مفیدترین نیشن
نیشن

فلاشکارت
احمد و
صفیہ

مرت عدة أيام ملأتها المناقشات والمعارضات بسبب ألوان جدران الغرف والسيراميك التي كانت حماي لا تتوقف عن مخاطبة ابنتها يوم شراءه بغير كلمة واحدة "ازتاغلي" .. لم أكن أفهم معنى تلك الكلمة التي تنطلق من فمها غامزة بعينها اليسرى كلما شاهدنا شيئاً من ديكور الشقة في تتابع مُريب كأنها بغاء لا يحفظ إلا تلك الكلمة فقط .. بعد عدة محاولات مُضنية مني للتعرف على معنى الكلمة الغريبة تلك أخبرتنى صفيّة بأنها ليست "ازتاغلي" وإنما "استغلي" أي اختاري دائماً أعلى شيء .. يا حماي هذه؟! .. هل تُظنني مُختلساً كبيراً في أحد البنوك؟ .. لماذا لا تُريد أن تقتنع أن راتبى الشهرى يجمعه سايس السيارات أمام "السراج مول" في يوم واحد؟ ..

مرت تلك الأيام بسلام والحق يُقال أن صفيّة لم تستجب أبداً لكلمة "ازتاغلي" تلك وإنما استجابت لكلمتى أنا "ازتنضافى بس فى المعقول" .. ثم أتى ذلك اليوم المشهود .. يوم شراء أثاث المنزل ..

وصلنا جميعاً إلى معرض الأثاث .. أول ما اتجهنا إليه كان جناح غرف النوم .. كانت صفيّة تُجملُ عينيها فى المكان وقلها يرتجف .. يبدو أن الأمر أصبح واقعاً فعلاً وأن أيام الراحة قد انقضت وهامى المسئولية تدقُّ بابنا سوياً ..

نهضت من على أحد الأسيرة التي كنت أستمتع بتجربة المرتبة الخاصة به ..
اقتربت منها ونظرت إلى عينيها ثم همست في أذنها :

- متخافيش .. هنكون سوا إن شاء الله ..

انقلب وجهي فجأة غضباً بدون مقدمات .. اضطربت صفة مع تغير وجهي
وسألتني :

- فى إيه يا أحمد ؟ ..

- أمك ..

- هى حصلت تشتم ماما يا أحمد ؟ .. طب وربنا منا قاعدالك فيها ..

- يارب ارحمنى .. قعدالى فىن يابت ؟ .. هو احنا لسه اشترينا عفش
نقعد عليه أصلا .. يابت بقولك شوفى أمك ..

أشرت إلى أمها التي أخذت تتجول فى جناح آخر .. هرولت إليها صفة
وحاولت جذبها من يدها إلى حيث تقف .. سمعت حماتى تقول :

- مش عارفه إيه ياخواتى البيت اللى مفيهوش نيش دا ؟ .. أومال
الكاسات والأطباق والصينى هيتحطوا فىن ؟ ..

رددت أنا بمنتهى الهدوء :

- مين قال إننا هنجيب كاسات أصلا يا حماتى ؟ .. مش دولاب بطولات
النادى الأهلى هو علشان نقعد نعرض فىهم .. أنا وبنتك مبنشربش شاي
والبيسى بيبقى ممتع كدا وهو بيتشرب من الإزارة على طول ولو جيتى
انتى وعمى تزورونا هنجيبلكم عصير مُعَلَّب .. وبعدين مش كل شوية

بنتك هتقعد تطلعهم تمسحهم من التراب وتدخلهم تانى .. مش فاضيين
احنا للحاجات دى ..

- يابنى النيش دا عزوة كدا هتחסس البنت إن عندها حاجات ليها قيمة
خصوصاً وهى بترص كل طبق وكاسة بفن ..

- بترص بفن ؟ .. ليه هى بترص حجرين شيشه تفاح ؟ .. طنط بقولك
ايه .. إحنا متفقين إن مفيش نيش ..

وضعت يدها اليمنى فى وسطها فيما رفعت حقيبتها على يدها اليسرى
المرفوعة تجاهى بالفعل وقالت فى ردح لا جدال فيه :

- إيبيبية ؟ .. يعنى إيه مفيش نيش ؟ .. والحاجات اللي احنا جايينها
بالشىء الفلانى دى هنوديتها فين ؟ .. طب أنا عديت حكاية مفيش فرح دى
بمزاجى لكن كله إلا النيش بقى .. بنتى متتجوزش من غير نيش أبداً ..
عايز الجيران ياكلوا وشى ويقولوا البت دخلت من غير فرح ومن غير
نيش كمان ؟ .. ليبيبية ؟ .. معيوبه وللا معيوبه ؟ .. لا هى مكسحه ولا
هى عوره .. دى حتى عفيه وزى الطورة ..

لم أستطع توضيح أن مؤنث ثور ليس "طورة" بالتأكيد و لا أن هذه الكلمة
ليست مدحاً على الإطلاق بسبب هذا السيل المندفع من فمها.. صوتها
المرتفع نبه أمى إلينا فأسرعت إلينا فضاءً للاشتباك .. أمسكت تفيدة بحقيبتها
وبدا كأنها ستخرج شيئاً ما .. خلعت الجاكت الذى ارتديه وأعطيت نظارتى
لأمى وشمرث عن ساعدى وكورث قبضتى وكأنى استعدُّ للاشتباك مع حمادة
مجانص الذى يسكن فى شارعنا وليس مع حماتى مع فارق أن هذه المرة لم

ترتجف فيها زُكبتى .. لكن للأسف أخرجت حماتى هاتفها المحمول .. يبدو أنها
 آثرت السلام .. فارتديت نظارتى ثانيةً فيما كانت صفة تراقب الموقف فى
 صمت .. أخذتها إلى زاوية فى المكان ثم قلت لها بهدوء:

- مش احنا متفقين يابنتى ان مفيش نيش ؟ ..

- والله يا أحمد قايلالها من قبل ما ننزل متتكلمش فى حوار النيش دا
 مفيش فايده ..

- أنا نفسى أفهم عاملهم إيه النيش دا من وهما صغيرين ؟ .. تحسى أن
 أمهاتهم كانوا بيقولولهم دايمًا "يابنتى الست مننا ملهاش غير بيتها
 وراجلها ونيشها" ..

فجأ انخرطت صفيه فى ضحك هيسيرى حتى كادت تسقط أرضاً ..
 صرخت فى وجهها بمنتهى العصبية :

- انتى بتضحكى ليه دلوقت ؟ .. دا وقت ضحك ؟ ..

- هههههه .. معلش معلش .. هههههه .. أصلها لسه قايلالى الكلمتين
 دول الصبح ..

-؟!؟!!

صفية

وأبيتُ ليلى أحمدُ الله أن كُنْتُ لي قدراً

فلا شئ إلا أحمد و صفيه

- 25 -

الشارع يمتد لنصف الكيلومتر .. محلات بيع وتأجير الفساتين على الجانبين
تعرض منتجاتها في بريقٍ مُبهٍر .. عينا صفيه تكادان تنخلعان على كل فستان
في الشارع وتلتصقان به .. بعد مباحثات ومشاورات ومجادلات أعنف من
مُباحثات أوسلو بين إسرائيل وفلسطين تم الاستقرار على أحد الفساتين في
أحد المحال الكبرى .. دخلنا وأشارت صفية للعاملة على الفستان المطلوب ..
بعد معاينة الفستان المطلوب والتأكد أنه مُطابق المواصفات الموضوعه من
قبلي بتغطية جميع الجسد وأن يكون سميكاً وواسعاً أتى صاحب المحل
لابلاغى بالسعر .. بابتسامهٍ ساحرة منى غمزت بعيني اليمنى وقلت :

- ها ياريس .. ياريت تكرمنا .. احنا اول مره نجيلك وإن شاء الله أجيلك
في جوازة تانية ..

لمحت من صفية نظرة مُرعبة فضحكت مُعلنأ أنى كُنْتُ أمزح فقط فعاجلنى
صاحب المحل بمزحةٍ مُضحكةٍ جداً :

- خمس تلاف بس يا فندم ..

- ههههه .. لا بجد .. هههههه .. دمك خفيف جدا يا ريس .. احنا ممكن
نكون أصحاب على فكرة .. هههههه .. بكام بقى ؟ ..

بابتسامةٍ واسعةٍ ولزجةٍ كرر ما قال :

- خمس تلاف جنيه بس يا فندم ..

لا أدري لماذا يبتسم هذا السخيف تلك الابتسامة السمجة ولا أدري معنى
لتكرار كلمة بس .. يُشعرنى أن "الخمس تلاف بس" شئ بسيط وكأنهم
"شوية فكة" بالنسبة لى .. ضحكْتُ مُحاولاً كظم غيظى وقلت :

- هههههه .. بقولك اكرمنا يا ريس داحنا أول مره نجيلك .. وبعدين
حضرتك مش واخذ بالك من حاجه .. احنا هناجره ليلة واحده
وهنجيبهولك تانى يوم ان ثناء الله مقلتش هنشتريه .. هههههه ..

- هههههه .. شفت يا فندم هههههه حضرتك اللى بتهزر أهو هههههه ..
الخمس تلاف دول ايجار الفستان فى الليلة يا فندم .. هههههه ..

لو صعقتنى صاعقه كهربية كان رد فعلى سيكون أهدأ من هذا وأنا أقول :

- نعم ؟ .. ايجار الفستان ليلة واحده خمس تلاف جنيه ؟ .. ليه ؟ ..
هتدونى الفستان وعليه عروسة ؟ .. العروسة موجوده حضرتك أهى ..
أنا عايز الفستان لوحده ..

- يا فندم أصله أول لبسه .. محدش لبسه قبل كدا ..

- متلبسش قبل كدا ؟ .. وانا اش ضمنى ؟ .. ميمكن اتلبس قبل كدا
وتيجى واحدة من الجيران تقول دانا شفته فى فرح حد تانى .. هتتفعنى
ساعتها انت ؟ .. وبعدين لما خمس تلاف جنيه بس .. اومال لو حبيت
اشتريه يعمله كام بقى ؟ ..

- تلاته وعش— , , , , , .

في حركة عفوية لا إرادية منى وضعت يدي اليمنى على فم الرجل ومنعته من الاستمرار في الكلام وقلت :

- وربنا يا راجل مانت مكل .. أنا لسه عريس جديد ومش عايز يجيلى الضغط والسكر دلوقت ..

كل هذا وصفية وحماي ينتظرون في صمت نهاية المداولات .. طلبت منهم الخروج من المحل وانتظاري بالخارج "مش طالبه فضايح قدامهم خالص" .. قبلت رأس الرجل واحتضنته ووعدته أن نصف أصدقائي غير متزوجين وأنى سآتيه بهم إن هو أكرمنى فى الحساب .. وحلفت له برأس جدى السابع سلامة أن ليس معى سوى ألفين وخمسمائة "بس" وضغطت على "بس" هذه بكل أسناني وضروسى وطلبت منه أن يتفضل عليّ ببقية المبلغ وله الأجر والثواب عندالله ولعله إن سترنى فى الدنيا أن يستره الله فى الآخرة .. تأثر الرجل أياً تأثر ولمحُ فى عينيه دموعاً ساخنة فمسحتها له بمنديلي فى عفوية وبلغ منه العطف والشفقة على أن أمر العاملة بإدراج الطرحة داخل الحساب قائلاً :

- يمكن ربنا بعتك ليا علشان آخذ فيك ثواب .. روح بينى ربنا يفرحكم ..
قلت مغالباً دموعى مُستعيراً لهجة سعدية التى تتسول عند ناصية شارعنا :

- متشكرين يا حج .. ربنا يعمر بيتك .. روح ربنا يباركلك يا شيخ زى ما اتفضلت عليا .. وأوعدك بنفسى هحافظ على الفستان ولا حتة جاتوه

هتلحوس الفستان ولا عصير هيدلق عليه ولا حد هيقربله .. فستانك فى
عينيا يا حج .. ربنا يخليك و يخليك ولادك .. ربنا يعمر بيتك .. ربنا ما
يوقعك فى ضيقه قادر يا كريم ..

- استنى بينى .. انت قطعت قلبى .. خد الكارت بتاعى أهو وروح بيه
لكوافير "برايد" اللى فى الشارع اللى ورانا وهما هيعملوا معاك اللازم ..
غلبتى نفسى لكنى شكرت الرجل وأخبرته أن ليس هناك حاجة للكوافير ..
عندما خرجت من المحل استقبلتنى صفة بنظرة مندهشه بعد أن لحت أثر
البكاء فى عينى .. وسألت :

- مالك يا أحمد ؟ .. فيه إيه ؟ ..
- لا أبداً يا صفيه مفيش حاجة .. انتى عارفه الجيوب الأنفيه وكدا ..

قاطعت حماى المشهد بصوتها الحاد :

- المهم حجزت الفستان وللا لا ؟ ..

- آه يا حماى حجزته .. حجزته ..

قلتها وأنا أتابع صاحب المحل من خلف الباب الزجاجى يقوم بعد الألفين
والخمسة جنيهه مَبْتَسِماً ابتساماً خبيثة .. مدت صفة يدها وجذبتنى من
ذراعى بعيداً عن أمها وقالت فى همس :

- أحمد .. لو الفستان غالى يا حبيبى بلاش منه .. ممكن أشوف فستان
تانى أرخص دا حتى الفستان دا عادى مش حلو أوى يعنى ودى كلها
ساعتين بتوع كتب الكتاب وهيرجع تانى ..

- لا يا حبيبتي ولا غالى ولا حاجه .. انتى اخترتیه خلاص وبعدين
الفتان حتى لو حلو مش هو اللى هيحليكى .. انتى اللى هتحليه ..

- ربنا يخليك ليا وميحرمنيش منك أبداً .. كفايه إنى هعيش معاك لآخر
عمرى .. بس علشان خاطرى لو الفتان غالى ممكن نشوف واحد تانى
أرخص ونعمل حاجه مفيدة بالباقي ..

نظرتُ إلى عينيها ثم ابتسمت و قُلْتُ فى نفسى " الحمد لله يارب إن هى
دى اللى كتبتها لى فى قدرى " ..

أحمد و صفيته

"

الأمان والاهتمام أحلى بكثير أوى من الحب

"

فلاشيان أحمد و صفييه

- 26 -

" أحمد .. أنا خايفة أوى من بكره " أتانى صوتها مُفعماً بكل آيات التوتر ودلالات القلق .. أستطيعُ أن أُميزَ صوتَ دقاتِ قلبها عبر موجات الهاتف بمنتهى البساطة .. أعلمُ تماماً بما يكتنفُ عقلها من تساؤلاتٍ وتخوفات .. استجمعتُ قواى وحاولتُ أن يخرجَ صوتى هادئاً مُطمئناً قدر الإمكان وأنا أقول :

- ليه بس ؟ .. صحيح هو أهم يوم فى حياتنا بس ميخوفش ..
- أنا مقصدتش بكره اللي هو بكره .. أنا قصدت بكره اللي هو المستقبل خايفه مقدرش أذى واجبى وأتحمل مسئوليتى فى الحياة الجديدة ..
- الخوف دا جوايا بردو .. بس دى سنة الحياة .. هي حاجه بنعملها لأول مره فى حياتنا وللأسف مينفعلاش تجربة قبلها .. أهم حاجه لما تفكرى فى بكره تقولى لنفسك .. لازم أنجح .. الخوف اللي جواكى دا يفرحنى إنك ناوية تبني معايا حياة وأسرة سعيدة ومفيدة للى حواليتها ..
- تفتكر هنقدر ؟ ..

- إن شاء الله هنقدر .. بالتفاهم قبل الحب هنقدر .. لازم كل واحد فينا يحط مصلحتنا الاتنين قبل مصلحته هو نفسه .. لاننا بكره هنكون شخص واحد .. مش هيبقى فيه أحمد و صفيه هيبقى فيه روح واحدة فى جسمين .. وللازم تكونى على ثقة إنى عمرى أبداً ما هعمل حاجه تزعلك ولو

حصل فتأكدى إني عايز منها المصلحة المشتركة لينا حتى لو زعلتك فى وقتها إن شاء الله بعد كدا تفرحك ..

- متعودناش عالمسئولية والضغوط يا أحمد .. أنا ضعيفة وانت عصبى .

- لو انتى ضعيفة هسندك ولو أنا عصبى هتخلينى أهدى .. بس لازم نكون دايما جنب بعض .. كتف فكتف زى ما بيقولوا .. الشعرة نفسها متعديش بيننا .. مفيش حد أبداً مهما كان يدخل بيننا حتى لو كان هدفه خير .. ممكن ينصحنا من بره لكن يدخل بيننا ؟ .. أوعى يا صافية ..

- حاضر يا أحمد .. حاضر .. أوعدك محدش يدخل بيننا أبداً وسرنا يفضل جوه حيطان بيتنا ..

- ربنا يخليكى ليا ويقدرنى أنى أوفرلك حياة هادية وكريمة تريح بالك وتسعد قلبك .. أنا لسه معملتش حاجه فى حياتى .. بس لو كانت الحاجه الوحيدده اللى هعملها فى حياتى انك تكونى مرتاحه كل يوم فى حياتنا وتكونى راضيه عنى هيبقى كفاية عليا ..

- ربنا يرزقنا المودة والرحمة فى رضاه يارب ..

- يارب ..

صافية

الفاصل الأخير

سَطَّرَ التاريخُ آلافَ قصصِ العشقِ لكنَّهُ لم يُخِذِ لنا سوى تلكِ القصصِ
التي انتهتِ بافتراقِ الحبيبينِ وتغافلٍ - بقصدٍ منه رُبما - عن سردِ تلكُم
القصصِ التي أذنَ اللهُ لها أن تستمرَّ بالزواجِ فاستظلتِ بالمودةِ ورُوِيَتْ
بماءِ الرحمةِ ..

فانحسرت
أحمد و
صفية

انتهى إمام المسجد من صلاة العصر .. ارتجف قلب أحمد قليلاً .. بعد دقائق ستتغير الحياة بالكليّة .. تلك الدقائق البرزخية ما بين حياته السابقة و حياته معها .. يشعُرُ بارتجافٍ قلبها بالأعلى في المكان المُخصص لصلاة السيدات .. تحسس وجهه الباردُ كالثلج مُوزعاً ابتساماته على أصدقائه الذين أتوا لتهنئته .. بعد قليل طلب منه الإمام التقدّم إلى حيثُ مكان الميكروفون وفعل المثل مع أيها برعى .. ألقى المأذونُ كلمةً قصيرة عن الزواج والعلاقة بين الزوجين وحث جميع الرجال بلا استثناء على الزواج حتى ارتفع صوتُ زفير زوجاتهم بالأعلى يتبرمن من هذا الرجل الذي أخذ يستفز أزواجهم للزواج عليهم .. بعد أن انتهى من كلمته أخذ الميكروفون وطلب من أحمد ترديدُ ما سيُلقنه له من كلمات لكن أحمد جذب الميكروفون منه بلطفٍ وقال له :

- حضرتك ابقى لَقْن عم بُرعى لوحدّه أما عن نفسى فأنا حافظ ..

استغرب الجميعُ من كلماته تلك فعاجلهم أحمد بالتطبيق الفعلى لكلماته وقال موجهاً كلامه لعم برعى مباشرةً دون أن يتفوه المأذون بحرفٍ واحد :

- بسم الله الرحمن الرحيم والحمد لله رب العالمين والصلاة والسلام على أشرف المرسلين سيدنا محمد صلى الله عليه وعلى آله وصحبه ومن تبعه بإحسان إلى يوم الدين .. إنى استخرتُ الله العظيم وتوكلتُ عليه لأطلب منك يا عم بُرعى سعيد راشد أن تزوجنى ابنتك وموكلتك صفية البكر العاقل الرشيد زواجا شرعياً على كتاب الله وسنة رسوله ..

أتم المأذونُ تلقينه لعم بُرعى فيما يخصه من الصيغة أما أحمد فكان يُلقى ما يخصه دون تلقين .. كانت لفتة رائعة منه أن يحفظ صيغة الزواج عن ظهر قلب .. يبدو أنه كان يستعد لهذا اليوم منذ أمدٍ بعيد .. أخذ يوقع هو على أوراق عقد الزواج وسط سُخریات وضحكات أصدقائه المتزوجين خاصة من قبيل " بلاش .. افكر إني قولتك بلاش " و " اضحك أوى .. بكره تبكى دموع وتقول ياريتنى " و " امضى يا أشول " و " الله يرحمك يا أحمد كنت طيب .. عملت في نفسك كدا ليه ؟ " .. كان الضحك يُسيطر على الجميع في أجواء سعيدة جداً .. بعد أن أتم توقيعه ووضع بصماته على العقد يكون هكذا قُضى الأمر .. أصبحت صفيّة رسمياً أمام الله والناس زوجته يحقُّ له منها ما لا يحقُّ لأبيها حتى منها ..

خرج لينظرها تهبطُ إلى خارج المسجد .. ظهرت من وسط صديقاتها اللاتي التففن حولها .. كانت رائعة بكل ما تحمله الكلمة من معنى .. ملاك رقيق هبط إلى الأرض ففاز هو به .. ترتدى فستانها الأبيض ذو غطاء الشعر الحملى وفوقه تاجٌ لم يستطع لمعانه أن يضاهى التماة عينها عندما رآته أمامها

.. اقترب منها وأمسك بيدها ثم قَبَّلَ قِمةَ رأسها أمام الجميع وقال بلهجة صعيدية خالصة :

- بجيتى مرتى يا به هع هع هع ..

انفجرت ضاحكة فأكمل هامساً في أذنها :

- شكراً يا صفية .. شكراً إنك اديتينى الشرف إنى أكون معاكى لآخر حياتك ..

نظرت إليه في خجلٍ كبير .. دمعت عيناها وقبضت يدها الرقيقة على يده بقوة .. تحشج صوتها وهي تقول مُبتسمة :

- عد الجمائل يا برنس .. أنا بس بحب أعمل خير فى الناس .. يمكن يكون فى ميزان حسناتى .. إنت بردو غلبان ومقدرتش أسيبك كدا الصراحة ..

- أنا اللى غلبان ؟ .. يابت دانتى اللى مكنتيش لاقية حد يعبرك فقلت أكسب فيكى وأتجوزك ..

- مين دى اللى مكنتش لاقية حد يعبرها يا خويا .. دول العرسان كانوا طوابير على باب بيتنا .. الجيران فى الشارع كانوا فاكرينا فاتحين فُرنة عيش فى البيت من كُترهم ..

- فُرنة عيش ؟ .. بيئه صحيح .. واحده أبوها اسمه برعى واسمها تفيدة هتقول إيه غير فُرنة .. لازم تقولى دلوقت بعد ما اتمكنتى وشربتك خلاص .. مانتى ضامنة العفش والقائمة ..

- لا يا حبيبى .. المأذون هناك أهو .. ممكن نُفضها سيرة من أولها ..

- بذمتك بعد عشرين سنة إن شاء الله لما هنيجي نفتكر اليوم دا هتبقى راضية عن اللي إحنا بنقوله دا ؟ ..

اتفجرا ضاحكين حتى كادا أن يسقطا أرضاً وسط دهشة الحاضرين جميعاً ..

على باب المنزل قبلته أمه ودعت لهما وبالمثل فعلت تفيدة مع ابنتها ثم أوصت أحمد بها خيراً .. وسط الزغاريد التي لم تنقطع دخلاً إلى المنزل ..

على الرغم من أنه أغلق الباب بمنتهى الحرص انتفضت صفيه ونظرت في رُعب إلى الباب الموصد .. زاغت عيناها وهي تنقلُ بصرها بين الباب وبين أحمد .. اقترب منها ببطء وأمسك بأطراف يديها .. كانتا باردتين كالثلج فضغطها برفق وحنو .. قبل قمة رأسها وقال مُبتسماً :

- متخضيش يا صفيه .. قوليلي .. انتى لسه على وضوءك ؟ ..

نظرت إليه في انشدها عاقدة حاجبها دون أن تُجيبه فأكمل كلامه :

- أصل فيه سُنه حسنه بتقول إن أى عروسين يصلوا ركعتين ليلة العرس أول ما يقفلوا عليهم الباب .. فقلت نصليهم واحنا كدا .. ببذمتى وفستانك .. إيه رأيك ؟ ..

أومات برأسها علامة على الإيجاب وقالت :

- أيوه .. لسه على وضوءى يا سى أحمد ..

ومنحته أروع ابتسامات حياتها على الإطلاق ..

فلاشبات أحمد و
صفيه

تمت بحمد الله

حسابى على الفيس بوك

<https://www.facebook.com/ahmed.i.moussa>

صفحتى على الفيس بوك .. همهمات قلم ..

<https://www.facebook.com/Hamhmat.kalam>

تنويهات سريعة :

* العمل لا يمت أديباً لأى نوع من أنواع الأدبيات وهو من باب التسلية و رسم البسمة فقط لا غير وأنا لا أجرؤ على دعوته شيئاً من هذا القبيل ..

* جميع الآراء والأفكار الواردة بالفلاشات تخضع لحرية الشخصية وهى غير قابلة للتنفيذ على الاطلاق ..

* لو حد نقل وقال إن الكلام دا للعبد لله يبقى كتر ألف خيره .. ولو مقالش مفيش مشكلة بردو يكفينى أنك ابتسمت وكنت عايز حد تانى بيتسم معاك .

* شكر خاص لمصممة الغلاف .. **إيمان فتحى** ..

* تحياتى لمجانين 8 غرب وقراء عصير الكتب ولأى حد هيقرى الهرى دا..

* النقل والنشر والتوزيع مفتوح فى كل الاتجاهات وعلى كل الأصعدة وبدون حدود أو شروط .. سواء نسخه إلكترونية أو ورقية دا طبعا لو حد " اتبهل " وطبعها ..

ونهاية أتمنى يكون عجبكم ..